

文登縣志卷一上

建置沿革

唐虞青州萊夷地禹貢萊夷作牧是也

舊志引堯典分命羲仲宅嵎夷曰暘谷又以縣西之暘里店即古暘谷堯命羲仲賓日處殊屬附會孔安國書傳東表之地稱嵎夷正義曰青州在東界外之畔為表堯時青州越海而有遼東樂浪三韓之地後漢書東夷傳曰宅是嵎夷曰乃暘谷指今朝鮮言禹貢雖指據後漢書以嵎夷為朝鮮地蓋朝鮮古屬青州與今登州之東境隔海相對正合孔傳東表之語非文登地也齊乘以甯海州為嵎夷亦誤

夏商青州地

舊志青州之域後為斟灌斟鄩氏封國考左傳使澆用師滅斟灌及斟鄩氏杜注壽光東南有灌亭續山東考古錄斟灌國故城在壽光東北四十里今為斟灌店斟鄩杜注北海平壽縣東南有斟亭平壽即今濰縣斟灌斟鄩在今壽光濰縣境內確有明證舊志緣府志之誤率爾採入殊為無稽

周青州地萊國東境不夜城即此

齊地記云古有日夜出見於東萊故萊子立此城名曰不夜故城在縣東北八十里今入榮城縣 舊志云周為牟子國地據山東考古錄春秋以牟名國與地者有二皆不在登州境內路史齊忌牟偪近臨淄

文登縣志

卷一上

建置沿革

一

乃遷牟於東海牟子國在今福山牟城社惟牟國原在今之萊蕪縣何時東遷諸書無考春秋襄公六年齊侯滅萊萊共公奔棠則遷牟當在滅萊後矣自牟以東別無國邑文登或其屬地也

秦齊郡腫縣地

史記秦始皇使天下飛芻輓粟起於黃腫元利志黃腫即黃縣腫即文登縣又史記秦始皇二十八年行郡縣乃並渤海以東過黃腫穿成山十道志文登漢腫縣有之罘山此據唐初言之福山亦文登地自福山以東皆腫矣方輿紀要腫城在文登西七十里或曰秦所置地沿寔宇記諸書傳刻脫去百字遂誤至今考寔宇記腫縣在文登西七十里清泮水側近與海畔之罘山相對是為今之福山縣而云縣西七十里其為脫去百字明矣但秦之腫東極於海漢之腫則今福山縣耳

漢置昌陽不夜二縣屬東萊郡

續山東考古錄昌陽縣故城在今縣西南三十里後漢書光武十王傳章懷注昌陽故城在今文登縣西南寔宇記萊陽縣前昌陽縣理在文登縣西南三十里昌陽故城是也又文登縣昌山宋永初山川記昌陽縣有昌山又云昌陽湯在縣西南四十里九域志文登有昌陽水是漢縣以文登之昌山昌水得名故城在文登明文如是

按縣之昌陽山東通志考之甚詳後惟續考古錄力為證驗始知近志之誤惟其引齊乘昌山為昌水所出則仍混入萊陽文登昌水不出於昌山又謂今縣西南有古橋河東南流入母豬河即黑水昌陽城當在古橋河昌山之東今考縣西南三十里昌陽故城基址猶存土人訛為康王城即漢舊縣晉惠帝元康八年始移於今萊陽縣 又按晉書地理志無昌陽縣宋書州郡志昌陽令元康八年分長

廣縣立則今之萊陽縣也新登州志只知萊陽爲昌陽不知漢縣所在又不肯實字記之文而移文登治所以遷就之云文登城當在今甯海西南海陽西北至唐麟德二年移而之東考文登建縣自北齊至今未移治所歷代地志諸書俱在府志不察而謬爲臆說武斷極矣

東漢昌陽縣省不夜入之屬東萊郡

舊志東漢省不夜入牟平縣考文登縣之西爲東漢東牟縣即今甯海州又西爲牟平縣則今福山縣是越東牟而省不夜入牟平斷無此理寰宇記今縣東北八十里有不夜故城後漢省併昌陽是也

魏昌陽縣屬長廣郡

晉省昌陽入長廣惠帝元康八年復置於長廣地在今萊陽縣界今縣

爲昌陽縣地牟平縣地

劉宋昌陽縣地牟平縣地

昌陽縣治在萊陽牟平縣治在福山蓋晉省東牟入牟平縣文登之南境屬昌陽北境屬牟平也

後魏觀陽縣地牟平縣地

文登縣志

卷一上

建置沿革

一一

觀陽縣治在今海陽縣魏書地形志觀陽有昌城即漢之昌陽城有馬賓山即今縣西南之馬鞍山有牛耳山即今縣東南之牛仙山蓋後魏復析昌陽置觀陽縣東極於海故今縣之南境爲觀陽縣地 牟平縣治仍在福山魏志牟平有之罘成山之罘在西成山在東則縣之北境屬牟平明矣

高齊天保七年析牟平觀陽地置文登縣

即今縣治

屬光州長廣郡周因之

寰宇記取縣界文登山爲名文登山在縣東一里

元和志謂在西北九十里縣所得名疑有誤

按文登置縣元和志以爲高齊後帝分牟平縣置寰宇記齊乘一統志俱謂天統四年置惟方輿紀要謂爲天保七年置北齊書無地理志考後帝紀天統四年無更置郡縣之文惟文宣帝紀天保七年詔曰要荒之所舊多浮僞百室之邑便立州名三戶之民空張郡目於是併省三州一百五十三郡五百八十九縣三鎮二十六戍文登置縣當在是年蓋省併牟平觀陽而置文登以方輿紀要爲是

隋文登縣屬東萊郡

隋書地理志文登縣後齊置有石橋有文登山斥山之罘山

按隋承齊周之舊東盡成山西有腫縣東牟觀陽之地疆宇甚廣故唐初析置廓定清陽觀陽諸縣皆故文登地也

唐文登縣屬河南道登州五代因之

新唐書地理志武德四年於縣置登州以東萊郡之觀陽隸之六年析置清陽廓定二縣舊唐書地理志貞觀元年登州及清陽廓定二縣並廢地入文登縣

按唐初於縣置登州亦曰文登郡見十道志清陽即今福山縣廓定縣地志諸書不載當為今之甯海州麟德二年改置牟平縣如意元年於牟平置登州神龍三年移登州治蓬萊縣文登屬焉

宋文登縣屬京東東路

登州東牟郡

金文登縣屬山東東路甯海州

元文登縣屬直隸都省山東甯海州

明文登縣屬山東布政司登州府甯海州

洪武三十一年於縣北九十里置威海衛東百二十里置成山衛南百一十里

置靖海衛成化中置百尺崖所屬威海衛濤山所屬成山衛甯津所屬靖海衛

國朝因之雍正十三年析成山衛置榮成縣威靖二衛併入縣屬山東省登州府

按 欽定皇輿表康熙間甯海州猶領文登一縣縣屬登州舊志不載改於何時疑在雍正十三年裁併衛所時也俟考河東總督王士俊疏稱文登幅員已極遼闊今再加以威海靖海成山三衛地糧軍

文登縣志

卷一上

建置沿革

三

戶其地周環至八百餘里殊難管轄而成山衛又未便聽其孤懸海濱且成山地方為海洋東面險要之區則成山衛自應改設一縣以資彈壓東以成山頭海邊為界西以文登縣橋頭集為界南自靖海衛之甯津所海邊起至西南文登縣屬之柳樹村為界西北以文登縣之周家村為界分撥文登縣之朝陽都十一里溫泉都之橋頭等七里雲光都之柳樹村等二里地畝錢糧併靖海衛之寧津所密南泊維軍草埠元正寨等屯俱歸改縣征收等因 題請奉 旨俞允

今縣境東西廣一百二十里南北袤二百里 東至榮成縣界六十里

西至甯海州界六十里 南至海一百十里 北至海九十里 東

南至榮成縣界一百里 西南至甯海州界六十里 東北至榮成縣

界六十里 西北至甯海州界五十五里 至登州府三百二十里至

濟南省會一千二百五十里至順天府二千二百里縣城在赤道北三

十六度十三分南界靖海在赤道北三十六度三十二分起東北界威

海在赤道北三十七度三十六分止東界東五度四分西界東四度二

十八分

舊志星野云縣入危九度考晉書天文志東萊郡入危九度東萊領縣十七一邑而占一度說本難通况二十八宿割屬九州以天合地理涉元渺前人已多異議今測赤道度數以邑境為準不用前人分野之說附天文於地輿劉

昭補注漢書例也

附雍正十三年以前文登縣舊界 西北接寧海州界自本縣陽里店起十里至板橋村又十里至三十里鋪又十五里至胡家莊又十三里至柳林村又二里至文登縣又十里至文登營又二十里至五岔口又二十里至報信店又二十里至橋頭集鋪又十五里至溫泉寨又五里至蒲柳村又二十里至黃埠村皆屬文登管內 自黃埠村五里至成山衛又三十五里至海為成山衛界 本縣南至老軍屯接靖海衛自屯至衛五里北至接官亭接威海衛界自亭至衛八里 以上舊界見 欽定皇輿全覽東西一百八十里南北二百里

形勢

鐵槎積翠層霄仰貫斗之形玉海環滄夾岸控朝宗之勢山東通志

憑負山海東陲奧區輿圖摘要

自唐宋金元以來縣之舊境西阻崑崙南北東三面距海為山左邊陲古稱天盡頭明時建立三衛備禦海防縣城居中三衛環列如星羅碁布形勢完固自分設榮成縣東鄙單弱如斷左臂

文登縣志

卷一上

形勢 山川

四

山川

禹貢以山川定九州疆界秦漢建置屢更而不敢失山川之限故州郡有易置而山川則萬古不變者也善乎于欽之言曰自圖經散佚齊地山川例蒙俗惡之稱况邑僻處東陲古籍既失流俗相沿自明以來修志者不能據地志諸書以正其訛以致境內山川半多舛誤今本各史地志並元和志寰宇記齊乘諸書所載者復其舊名而海疆島嶼池沼溫泉以類附記焉

泰山之脈東行者薈於棲霞之艾山由艾山東北至鐸山折而北為鵲山又折而東北至鷹嘴石為寧海州又折而東峰巒矗矗望之若旂旗若檠戟若奔馬游龍青黛一色南北綿亘二百里外障東海內蔽三齊是為崑崙山文登在山之東萬峰巒岼皆以崑崙為祖由崑崙而東北為陽里口又東北為愛山由愛山而東北為奈古山舊威海衛在其下自愛山而東南為著棋山自著棋西南行者盡於丰山文登縣在其下著棋山南出為駕山駕山東北入榮成縣盡於成山頭駕山西南行為

萬壽山又南爲鶴鷗山又西爲雙頂山又西爲娘娘頂折而南爲岱山爲柘陽山又西南爲鳳臺頂盡於五壘島自萬壽山而西爲架子山爲廟山又西爲萬石山又西盡於馬山古之馬賓山也由廟山西南爲摩天頂又西南爲昌山漢神龍祠在山上山之陽爲漢昌陽縣以昌山得名故址猶存又西爲九頂埠又西南盡於姚山頭木渚河入海處也由駕山而東南爲李家山牛仙山鄒山又南爲石門山蓬萊山又南爲黃華山又南爲望港山又南爲黃山又東南爲斥山折而西盡於鐵槎山奇峯九頂黛色參天南連大海西有故靖海衛由崑崙山而西南爲紫金山又南爲崑山折而西爲虎窠山在木渚河南岸北與姚山頭相對東水東流天然門戶此邑中諸山大勢也其分隸榮成者詳榮成志

文登縣志

卷一上

山川

五

陽谷小識曰邑處萬山中而以崑崙山爲西北維著棋山爲東北維斥山爲東南維崑崙山爲西南維

王志有鐵官山在縣西七十里新登州志在縣西一百四十里考一統志鐵官山在甯海州西南四十里漢鐵官鑄冶處舊志失考今不載又舊志峨石山召石山今入榮成

崑崙山在城西六十里一名根余十六國春秋石勒遣石虎擊青州刺史曹嶷嶷議欲徙海中保根余山卽此一名姑餘仙經云麻姑於此修道上昇餘址猶存因名姑餘蓋根余姑餘崑崙以聲相近而轉其最高者名大白頂一石大悲頂甯文於此分界山之西面距甯海境東一面入文登實爲甯文鎮山明代以前老樹參天人迹罕到獸有鹿豕禽有子規 國初以來生齒日衆山木伐盡樵蘇可通山中雲烟綺縠冰雪琢鏤四時幽絕迥異人間羽客道流往往棲止世所傳王真人及麻姑

上昇遺址多在甯海界

江都吳肇煜遊姑餘山詩二首

聞說姑餘勝同遊物外身雲中穿徑客天半上山人路僻犬聲急林深鳥語頻征衣沾雨濕到此拂清塵
四望崎嶇路烟光逼眼迷橋危人不度風急馬頻嘶翠色峯千仞清流水滿溪登臨心共適身與碧雲齊
桐城方根本暮春遊姑餘山詩二首

一室開幽處僧廊夜坐閒案留千頃月窗納四圍山所得烟霞外安知人世間林風動清聽萬響落松關
選石坐清曉登臨思不窮鳥喧深澗裏人影亂流中風激水聲急烟浮山氣空崑崙佳勝地清興更誰同
南昌熊學煜遊崑崙山詩

靜室聯吟客悠然心境間有時惟聽水無處不看山人坐翠微裏窗開綠嶼間夜深移燭盡涼月到禪關
知縣王一夔遊姑餘山詩二首

石磴躡層觀森森萬木陰晦明幽壑態去住白雲心寂寂壺天迴悠悠蓬海深麻姑不可接證果向誰尋
古樹插青霄盤根歲月牢階前留蔭澗殿角拂雲高夜雨鳴天籟晨風聽海濤斯遊當溽暑選石坐揮毫
邑人林鍾岱曉經崑崙山詩

合沓羣峯亂春雲向曉生無從尋鳥道何處問人行霞暖桃初綻山空澗自鳴策驢三十里猶未辨陰晴
邑人呂肇齡遊姑餘山詩二首

擬買青山住蕭蕭策杖行到來塵慮滌直覺道心清洞古雲張蓋花閒鳥喚名寂寥人境外風動閣鈴聲
勝地元幽絕徘徊薄暮時晚煙迷大壑殘照入清池山靜鐘鳴遠林深月上遲奚奴引歸路筋力不知疲
呂肇齡再遊姑餘山詩

看山比讀書知新在溫故舊遊十年前猶記登臨路連磴霜華濡風吟紅葉樹懸溜下層厓吼如奔雷怒

文登縣志

卷一上

山川

六

微徑一以折巖深谷盤互迤邐造禪宮鐘梵雲中度仙洞豁豁舒峭石屹森布遙遙望海亭溟濛積烟霧
天高萬象殊地迴百靈赴心神所應接塵夢恍已寤昔來何草草今茲領異趣乃知探奇者名山屢振步
君看蘇子瞻前後赤壁賦

邑人于熙學西山詩二首

峯環澗複歷紆徐七十二庵隱者居見說此山三百里崑崙或恐是根余
搔首青山宿霧殘西風吹徹海濤寬直從初日蒼涼外獨上峯頭萬里看

于熙學憶崑崙詩

登萊神仙窟塵土淨如掃豈惟天宇清山川景亦好而况大崑崙春秋饒芳草自從七真來無人蘊文藻
朝朝麋鹿間日日煙雲老荒涼神清觀寂寞安期棗我昔曾周覽杖屨香滿道水光染山青松樾皆十抱
至今猶入夢何時更探討洞口問蓮花峯頂望蓬島因之二勞遊采詩可參考沈吟身漸衰茫鞋著難保

紫金山在城西五十里金大定壬寅馬丹陽過而喜之曰此洞天福地
名勝處也建東華宮於山前元大德壬寅李道元開石洞曰朝陽洞山
之西北五六里兩石屹立高三四丈狀如新月俗名月芽石隨石之凹
凸刻道德經文錯綜成行大抵金元諸真人所爲一統志紫金山一名
崑崙高出天半俯瞰大海有泉曰靈源泉山之後爲九龍池入甯海界

詳見州志

邑人呂潤芬夜登紫金峯詩

落日千峯夕蒼茫晦遠村深林呼野鶴遠火點秋原風力當松壯山形入夜尊劃然動長嘯彷彿是蘇門

邑人于觀貞雨後遊紫金峯詩

紫金峯下訪全眞曲轉蘿坡少四鄰策杖頻懷招隱願披榛忽結看山因雨餘屐踏苔雲破洞口泉梳石

髮新仰羨五華碑字

古攀登獅座更揮塵

撇篲山在城西南三十里單椒獨起峭削秀拔上有靈泉有碧霞元君廟東爲亭四顧蒼然山海繡錯賽神者先以靈泉盥手漱口而後入廟以示誠敬舊俗也啓堂隨筆文登西南有山突出兩大河夾之蒼翠聳秀崔巍嵯峨土人以撇篲名余以字音測之必是特秀曰撇篲者聲之轉耳

邑人林丕欽登撇篲山絕頂詩

曾聞海客說三山鰲背負來青插天陸沈誰知幾今古滄海倏忽變桑田萬派朝宗東南去贖此奇峯始

文登縣志

卷一上

山川

七

何年孤撐直爲天作柱峭拔如同華嶽蓮古廟丹青雜鬼怪鸞翔鳳翥參羣仙天門高步觀瀛海鐵棧咫尺九頂圓北顧崑崙嵐朝萬笏龍池噴雪落檐前掬撫星宿霄漢上雲霞繞膝珠斗懸回頭下視塵寰小只因身在日之邊

愛山在城北七十里有泰山廟其下有洞曰愛山洞見寺觀

今作艾明碑作愛

老雨頂俗呼玉皇頂在城東北五十里上有石廟明宏治十七年建崇禎元年康熙二十四年重修旱澇祈禱無不靈應山極高峻登其巔則見三面海水際天崑崙崙峙其西南著棋對於東南四山合抱羣峰皆小鄉進士叢雲燦碑云茲山蓋高爲我境內第一峰歲在辛卯鄉之善信士琢石爲尊飾以金碧爲禱雨處也

轉龍山在城北二十二里古名磨兒山由東迤西盤曲五六里如神龍宛轉故改名東有大石險怪如臥虎俗呼爲老虎窠下有二洞一東南

向一西南向天然相對深藏不測東一洞上有古篆數字剝蝕不可辨山之西舊有石廟村人禱雨祈晴及染病而禳者無不應遂共議陶瓦增椽爲廟落成之後適天陰雨忽一人自外至衣雖藍縷氣象異常問其姓名不作一語拾香爐中餘燼畫字於牆云轉龍山八景畫畢即去咸以爲仙

著棋山在城東北五十里俗名正棋山由崑崙而東以此山爲巨鎮頂有玉皇廟廟西有石枰方丈許色深翠界畫天然墨色深入石髓兩旁坐窠天成無斧鑿痕相傳爲仙人著棋處棋枰之西有自來碑聳立石壁高七尺廣三尺餘厚近尺無建鑿之迹可尋碑之中行四大字曰洞天府地兩旁及碑後小字有乾坤日月地天泰有生不爽等字餘多模

糊山之東北有白鵝石突然而出光潔可鑑遙望之如白玉琢成石之東有地泉一名地河深藏山腹尋之不見但聞水聲潺潺山下有洞名水洞洞門闊容數人漸入而路漸隘僅可容身碧水澄澈其深無底緣水岸石齒側足僂行既入又闊如是者三則石壁雲蒸路暗水隔不可復入相傳其下通北海云又有朝陽洞火石洞和尚洞皆幽邃山石中碑材色碧而質堅邑中古碑數千年不剝者皆此山石也山之西曰蜂山山隙時有蜜蜂出入故名

榮成歲貢韓士仁自來碑詩

著棋山上自來碑棋盤石西路之隈孤嶂聳立臨絕壑峭石生根何折摧借問土人幾多載百歲老人如童孩洞天府地無缺畫迢勁與曲古體該乾坤日月地天泰有生不爽無疑猜其餘模糊不可識搜折枯棘剔莓苔殘書欲讀不可讀蛟龍怒鬪忽離開掬土拭之拂以袖極窮目力不矜哀最古張國獨古邁一字費盡數徘徊佶曲整牙語不貫重重石髮字多埋獨立山頭長太息恐是飛來峯飛來

白鹿山在城北四十里寰宇記唐神龍三年刺史畢元愷獲白鹿於此
燒車嶺在城北三十里

幞頭山在著棋山西十里許以形得名又城西十二里有幞頭山山石
突出形似幞頭其下爲幞頭村

駕山在城東北三十里傳爲秦始皇駐蹕處其北爲天門澗南爲駕山
寺古名清涼寺

天福山在駕山東南隅四面奇峰環抱中有地寬廠圍五里許突起平
臺國初大水泊于氏建佛刹其上院宇幽邃竹樹陰森士人往往讀書
於此臺之左有甘泉繞臺流涓涓不絕每當春夏之際樹林翳影雜鳥
弄聲極爲幽勝

文登縣志

卷一上

山川

九

萬壽山在城東二十里山陽有古嘉會院今名洪教寺

六山在城東五十五里六頂相連故名有六山寺

邑人于熙學夢遊六山詩

萬里誰能汗漫遊依然身醉六山秋寺門靜對公孫竹村笛遙呼子母牛領客尋花懸塵尾看僧掃壁待

蠶頭題詩未竟鄰雞

動夢斷空齋古錦收

三奇山在城東二十里上有龍穴石竈仙人迹因以三奇爲名林壑幽
邃神仙窟宅也

鶴鷗山在城東南二十里寰宇記此山常有鶴鷗棲止故名今名金嶺
山又名佛爺頂石上蠣殼紛如或云舊時南連大海故孕此今山去海
二十餘里

廢鐸嶼曰縣治南長山一帶雅似外屏其東南二十里有山高出羣峯勢如建瓴山巔之上其平若砥繚
以周垣中建佛殿俗名佛爺頂因廟得名也山之周遭大小村落碁布星羅或橫掛山腰或潛伏澗底土

田無多類皆膏腴草天木喬衣食充足不廢絃歌諸生明經絡繹不絕科目則數十年而一見不可謂非山川靈秀之氣之所鍾也

柘陽山在城南四十里明時昌山神龍移祀於此有龍王廟山橫亘數里其南有古寺曰柘陽院峰巒合抱規模宏敞廟之西又有小殿三楹謂之西院逼處山阿石骨嶙峋殿後石洞中常有巨蟒潛伏天將雨輒效雞鳴時出遊人或見之不避人亦不爲害乾隆三十年蟒去不知所

之柘古碑作遮

邑人賽珠遊柘陽山詩

山勢屢屨盤海曲遊人一步一躑躅我從崑崙山下來猶貪山色入山腹千載空傳柘陽名到今不見柘陽木惟有鬱鬱萬松林亂峯高下迎人綠巖底碧瓦參差雜茅屋入門突兀摩雙碑苔蘚斑駁不可讀金皇統元至正達魯花赤字髣髴老僧延客關深堂隨意起坐無拘東西行更上老龍宮畫壁森羅紛水族馮夷擊鼓鼉舞指點丹青看不足我生性癖酷愛山老樵牧童喜追逐竭來茲遊真奇絕幾時踏徧海山麓拾紫芝調白鹿蓑衣籜笠愜幽獨

五壘山在城南五十里山下卽五壘島海口寰宇記其山南北成行入

文登縣志

卷一上

山川

十

海如壘焉

廟山在城南十里北對縣城爲城南屏障其西爲摩天頂

萬石山在城西南十里下有石屋明嘉靖間邑人叢磐講學於此巖畔有萬石山三大字方廣丈餘磐所鐫也萬石山五箇頂本是一山其東峰稍大曰五箇頂其西峰差小曰萬石山

名勝志萬石山上五頂相連尖峯峭削俗名五個頂此大誤五個頂別自爲山不在萬石山上

江都吳肇煌萬石山詩

萬石巔岫曲徑通登臨身到白雲中千層松葉晴嵐翠數仞楓林夕照紅秋草晚連孤嶂遠飛泉響落半山空攀援更上丹峯頂天海蒼茫望不窮

邑人于觀貞初春自縣城訪萬石山紀遊詩

我聞萬石高巖巖礪礪嵌綴標雲揭今朝訪春指城南逶迤十里山相銜澗草初舒林蘂捲穀雨已屆風未輒袂單隨步錯復參朶者躍者兩兩三坐憩橫岡陴纔展行穿坳澗展旋轉轉東環瑣嶺如函陡撐北角青巉巖倒仄蹲熊仆壓虎尖削連仞揮神斧何年龜骨蛻成印寶空確疊奔星稠轉猜金踊洪爐熱天匠踏傾灌頭鐵西南一峯關亦奇半壁峭鑿創閣基祇今大士跌盤住傳卽少保兀誦處鐫崖二字懸書空阿誰還逞椽筆雄竭來弔古苦生晚尋山有與命途憲杜鵬藏苞還放花應怕催歸觸念家詎知垂老

無家絆正好
樓霞愜巖觀

馬鞍山俗名馬山在城西南十里中多石洞今塞魏書地形志觀陽縣有馬賓山即此北魏縣之南境隸觀陽故以馬賓牛耳諸山定疆界山產繭最良土人名曰馬山繭

昌山俗名回龍山金史地理志文登縣有昌山一統志作昌陽山山南有漢昌陽

縣城遺址一統志昌陽山在文登西南十里上脫三字一名巨神山或作巨神鳥在城西南三十里山有巨神龍自

漢已著靈異建祠山上寰宇記引宋永初山川記云郡國志昌陽縣有

巨神龍有祠能興雲雨崔炎避黃巾賊於此山昌山之南濱海故亦可謂之鳥隋書地理志昌陽縣有巨神山考隋

之昌陽縣在今萊陽縣東南二十五里乃晉元康八年自文登徙此亦在昌山之陽有昌山無巨神山隋史蓋緣漢志之文未加詳考故以文登之山誤注於昌陽縣下齊乘昌山在文

登縣西南三十里有巨神龍龍祠坊本齊乘作巨神鳥蓋傳刻之訛引齊乘此條作巨神龍登州舊志引齊乘亦作龍字欽定皇輿全覽

文登縣志 卷一上 山川

自明以來昌山之名亡昌山神龍亦失所在遂移祀神龍於縣南四十

里柘陽山此即今俗所稱禿尾李龍王也修志者不考古籍鄉里相傳遂多異說康熙五十三年龍見於宋村之北山

即昌山山名既失山南有宋村集土人名曰宋村北山一時闔邑闐闐立廟山巔改名曰回龍山此昌山改名回龍之始見

邑人賽珠詩注自是又移祀神龍於昌山每歲三月初二日俗傳為龍母誕辰妝

演雜劇為龍母上壽香火之盛甲於東方道光二十八年山東巡撫徐

奏請 敕加神龍封號奉 旨封溥惠佑民四字神龍遂列祀典

按宋永初山川記所引郡國志蓋晉司馬彪郡國志劉宋時其文猶存也今永初山川記已佚幸寰宇記載之齊乘亦本寰宇記而坊本多誤龍字作鳥昌陽故城在縣西南三十里亦見寰宇記昌山在故城之北神龍漢祠久廢今祠則始於甲午數千年靈迹頓還其舊賴宋元地志諸書在耳 寰宇記海牛島引郡國志之文按水經注有司馬彪郡國志今亦不傳

王志縣南柘陽山有龍母廟相傳山下郭姓妻汲水河厓感而有娠三年不產忽一夜雷雨大作電光繞室孕雖免無兒胞之形後每夜有物就乳狀如巨蛇攀梁上有鱗角怪之以告郭郭候其復來飛刃擊之騰躍而去似中其尾後其妻死葬山下一日雲霧四塞鄉人遙望一龍旋繞山頂及晴見塚移山上土高數尺人以為神龍遷葬云後禿尾龍見年即豐每見雲霧畢集土人習而知之因構祠祀之歐志同惟改

郭作
李耳

按 欽定皇輿全覽引康熙舊志此條亦作郭姓妻與王志同歐志又改爲李姓妻郭氏忽郭忽李然則神龍之姓無定矣其實二志皆無確證各據一時俗說採以入志久之遂成故實其所以稱此二姓者亦有故焉自明移祀神龍於柘陽山山之後多郭姓山之前多李姓也又縣之南境回龍山柘陽山蓬萊山棋盤山等處皆有龍母墓然則墓亦無定矣總之深山大澤實生龍蛇以人生龍於古未聞龍有姓有父有母其母又有墓墓又不一處姓又不一氏皆有明以來里俗之談宋元以前地志諸書俱在無其說也

鐵槎山房見聞錄叢少保蘭初通籍時曾爲貴溪令嘗於張真人處遇同鄉李龍神曾求公向真人緩頰欲回家視其母公爲代請真人曰此非不可但宜遵海濱而行免傷禾稼耳忽霹靂一聲龍神已不見矣後公每暑日徒行頂上必有烏雲一塊相覆即神龍之報也按此亦採俗說以人稗乘神龍愈幻怪矣考明史叢蘭傳蘭登宏治庚戌進士即授戶科給事中終其身未嘗官貴溪縣令其說之荒渺不辨而明矣自明以來神龍之說愈傳愈謬故王志入於怪異歐志列於雜聞皆不合書莫古於易易之乾卦聖人取象於潛龍見龍蓋陽剛之德能興雲雨利萬物與大人同符龍自不怪傳者怪耳今復昌山之舊名溯神龍之故迹本宋元之遺書而正以 國朝之封號古籍 朝章炳耀千古舊志諸說存而不論可也

邑人賽珠龍母宮吟呈邑明府王公

柘陽山頂龍母宮下瞰萬井上撐空龍母宮畔龍母墓樵採不入松楸路當年龍母產龍子崢嶸頭角秀厥尾磨牙攫爪騰空去朝泛清江暮黑水異物不忘母氏恩鳩來歸葬巖谷裏風姨執紼龜鼈贈水晶珊瑚來海底至今膜頌走千村珠宮貝闕山頭起曾無碑碣鐫年代土人荒唐呼老李祈晴禱雨劇有靈龍

文登縣志

卷一上

山川

十一

兮歸來禾黍登聞說老僧小不謹轟雷掣電一時迸邇來一去不知還前年移向回龍山雕甍甃石窮民力更築龍宮闢荆棘廟貌巍峨總一般喜新厭故理或然但是年年收玉粒不惜處處拋金錢卻怪今秋大雨雹霹靂連旬失望湖稻子熟時未上場狂飆哮吼奔如削可憐野哭滿溝塍拜上龍宮知未曾咄哉愚鹵真難曉轉悔山場事不了明府王公智以廉洞祭民隱知神好願上此詩到公府傳諭千家曉萬戶更假明威呼孟勞鑿斷靈根開聾聵

龍歸大海不回首自今以始歲其右

康熙甲午移祀神龍於昌山重起祠廟改名回龍

山即此詩中注語存此以備掌故使後世有考焉

娘娘頂在城東南二十五里山極高峻頂上有文峰塔建置無考洪武

間重修嘉慶戊寅夏雨連旬塔復頽廢道光己酉重修南海行船者視

以爲準也山腰有馬蹄石石上仙人行迹宛然其西有古洞甚幽邃山

下爲顧家村村南山亦有塔村西卽白佛寺寺南爲岱山有塔與文峰

同

鄒山在城東南四十里東與牛仙山連山極高峻鳥道崎嶇攀緣可上

三面海濤奔赴眼底山南有鄒山庵山西有廩生于選墓卽孝子于令
蒞廬墓處墓西北有石方正如几舊名馬臺石孝子改名方石晚年自
號方石老人

牛仙山在城東南五十里卽魏書地形志之牛耳山後改名平山舊志
無名真人結庵於此乘牛得仙鄉人稱爲牛仙因改爲牛仙山唐順之
左編王玉陽初居牛仙山卽此

石門山在城東南五十里寰宇記山有二石聳立高二丈東西相去一
丈望之如門卽此廢鐸嚙曰邑東南有兩石突出平地高各三尋銳端
南曲遙望雅似羊角迫而觀之北向作獅子形邑乘所謂石門山也土
人名之曰雙石周遭地勢平衍六村環繞皆名雙石因石得名也

文登縣志

卷一上

山川

十三

蓬萊山在城東南五十五里有龍王廟

望漿山在城東南七十里山下有望漿寺古刹也

黃華山在城東南五十五里古黃華關也有黃華廟其西卽千八港

塔兒山在城東南七十里一石突出形狀如塔故名今仆

廢鐸嚙曰余村東南十餘里有山曰塔兒形勢不甚高廣河經其陰東入於海土爲水齧遂爾壁立山之
上石骨嶙峋悉出地上中有高石直矗上圓下方雅似浮圖曰塔兒山者因石得名也河廣不過數尺北
岸則平沙無垠幾近里許每秋水暴漲山下深可滅頂其餘不過及肩南岸則沒脛而已河之北岸有村
曰塔兒山亦因山命名也其村雖臨大河絕不爲害村有數戶類皆素封有某翁者思築室以廣其居乃
糾合村人共取山石有長於風鑑者止之曰河伏山下從未泛濫以石塔故若毀石塔恐河徙無常矣不
聽鳩工劈石塔隨之仆毀以築室未幾河流北注岸當其衝遂成峭壁高逾尋丈水至岸崩村舍半淪於
河於是北徙其居而河流則屈曲如蚓南北衝突毀良田無算河水去村不過數武而村亦貧不能支夫
天地生物各有其用剛愎者任意毀敗卒至身罹其災悔亦無及若此村者可爲殷鑒矣

斥山在城東南一百里跨文榮兩縣界亦作赤金元爲鎮設斥山寨巡
檢於此邑中于氏昔家焉故曰斥山于

齊乘爾雅云東北之美有斥山之文皮焉蓋以海濱廣斥得名高門之族居此有千餘家東齊于氏皆斥山望也欽之曾大父端叔府君自斥山徙昌陽大父君瑞府君其仲子也又自昌陽徙益都先考禮部公嘗命欽考斥山于氏所出欽對曰按氏族略于氏本周武王子邗叔所封之國在河內邗城子孫以國爲氏去邑爲于後魏時有自東海隨拓拔徙代改爲萬紐于孝文復爲于氏又有淳于姜姓之後唐避憲宗嫌名亦爲于氏此鄭氏之說也然史記文王伐邗書大傳正作于于蓋古諸侯之國非始於邗叔也又夏相時于夷來賓子欲居九夷于夷其一也或卽嶠夷之轉或于國之裔有奔海濱而君長東夷者何其族之蕃而世之衍也斥山之于祖此爲的先君頌之

黃山在城東南八十里山之東頂舊有石砌龍王廟建置無考壁有石碣祇天啓年號依稀可識 國朝康熙五十二年重修靖海衛廩生常元素撰碑字亦多剝蝕略云廟有奇靈康熙間有戲於廟者雷電下擊之人感其靈旱乾水溢有求必應四十七年久旱不雨或以惡祈又以雷擊之斃者四人震驚幾斃者十餘人惟神作威故能作福吾鄉蒙其福而畏其威焚香設奠爰作新廟以示久遠

鐵槎山在城東南一百二十里齊乘鐵槎山東連斥山甚奇秀圖經弗載豈古與斥山爲一與 欽定皇輿全覽鐵槎山相連九頂南瞰大海絕頂大石之上有龍窩龍迹有龍池池水大旱不乾有清涼頂千眞洞山東有石名曰上天梯以手拂石方能行年久手印入石寸許東頂有雲光洞卽王真人修煉處東南有雲蒙山山下有水簾洞洞內有二石珠每遇將大風雨珠盪激響如雷土人以下陰晴焉每歲元旦水退可步至洞門外窺之窅然無際洞門題水簾洞三字大如斗過日則水勢汪洋怒濤洶湧舟人祇遙望之非飛仙不能至也明常康鐵槎山詩羣峯簇翠五雲中眼界橫收六字空山對鼇頭開貝闕水環螺髻現珠宮龍藏古洞風雲合人泛仙槎霧雨濛幻迹三山誰慣見登臨縹渺盼仙

按鐵棧山又名北棧高一千八百十九尺與江南余山相對謂余為南棧此為北棧見海防津要表余每赴京返煙台恆聞船客舟子常言以望見南棧北棧為將至云
邑人宋啓元遊棧山記

棧山為大東勝迹距縣城百餘里余髫齡時聞諸父老曰此巨觀也邑士大夫及四方來遊者每杖履過焉余聽其言輒神往及聞此山佳景多踞險絕遂巡不敢前己丑春邑侯尙金望約余同遊時並轡者邑人劉月坡叢蓬衷也初夕宿黃山叢丹山邵函三至于聖水于籬瞻于阿輔至靖海常凝社又至次早抵山下從山之東北徑登焉巋嶙困上挺修林懸泉飛瀉密蔭沈沈娛心快目此焉其極自麓至顛約十里有奇履一徑曰摩挲佛側身似海畔仰面有蘿叢佛立深崖人攀滋懼轉一徑曰上天梯盤空鳥道巖石接天行者披汗僉曰憊矣猶堅厥骨力循階以升余觸景興思攝衣遲遲至山椒殿宇剝落蒼鼠窟瓦後則石壁峭立藤挂如帷昔有修煉於斯者以鉢剗石成洞不瓦不椽鉢痕四壁內鑿于佛於上名千真洞尙公詔余與聖水對弈於石屋中此時兩入不言頗有今古一局之感洞之東南有仙人禪室僅存圯址丹竈石髓玉笥神書杳然不可問徒向邱岑上延佇白雲耳散步而南二三里登清涼頂高居諸峯之首佛閣半間雲根為牆海水落眼前天光搖空碧煙籠帆影瀾逐鳧飛極目四望不知有人間世也反憇道人方丈內須臾步殿外登古塔遙見西岫上夕暉半落流霞啼鳥客劇飲歡甚余危襟倚塔長嘯高吟山鳴谷應塔塔之殘落為之感廢興焉諸同志告辭余低徊留之不能去月坡攜余寢煉士定所月出峯頭寒砌蟲吟潮聲汨汨如生枕上餘光明滅之下有翩翩羽衣子持鉢長跪俯仰作態遂且不輟余亦清興飄然置身於崑崙元圃中矣次早將歸尙公語余曰殿西有藏仙洞九龍池覽未竟其奚歸隨眾適洞所見一石路橫僅二三尺上摩青霄下臨無地好事諸少年手引蘿石縮足懸空而過入則四面如

文登縣志

卷一上

山川

十五

堵可藏人百餘居民曰此避兵所也龍池較此洞尤峻險尙公呼之同登余謝不能強之乃登鏡石為階滑難駐足及巔東西石坡橫二三步欹斜如屋脊狀南北夾岸下視萬仞上抵龍池丈餘登者僉倚人臂作梯層巖而上余幾失步阿輔亟掖之乃免入山二日從山之西路旋焉過石穴長一里餘非工非匠結構天然晝晴而陰澄滑不雨前步數里石屏削成淵水潺湲凝社主觴政留飲席地而坐書詩於石興闌人歸過高村計回縣聖水輩強邀之宿大水泊宴阿輔竹月齋會縣署報胝履之變尙公錯愕猝然而散嗚呼一日之間聚散憂樂有數存焉未可強而致也而况於關天地之運會係生人之遭逢尤其大且遠者乎援筆記之

邑人呂肇齡遊鐵棧山記

乾隆乙未七月二十三日余以事過河口村村距鐵棧僅三里許友人劉墨林邀余往遊因與其西席李雲友攜榼同行行半里茅舍蕭然滿庭竹樹則張道士所居也匆遽不暇流覽徑取道以往由山之東麓捫蘿陟磴層累而上其山之巖起者獨豎者直折者橫裂者凹者凸者罅者墜者形勢奇詭莫可名狀自朝至於日中才得履山腰由此而南山益峻徑益狹峭壁萬仞鑄二石佛於其上名曰摩佛頂下臨深壑不知幾千丈予懼蹈昌黎之號心悸欲還同遊憇憇之遂復整筋行騰與鷹鷲爭綫路並股酸哀凡歷數十石級方敢施施而行行里餘再逾小岡乃見清涼頂頂之下地勢平廠周遭十餘丈玉皇殿在焉殿之陰則千真洞洞上龍池深莫能測右折而下則捨身臺臺畔古贄冬夏水恆沸湧當茲秋風颯爽披襟下視海波激盪舳舻銜接繡陌村烟樵歌漁唱莫不廻巧獻技於萬峯之下此殆天作地生以開偉觀者與因淨白狂歌率成七古疥於壁以資來遊者一噱焉

行行東海上計程剛百里鐵棧當我前欲往味所指幸此一二同好人導我前路河之滙入山陰風冷毛髮三里五里披荒榛杳障紆迴飛梁架嵌壁天光通一罅欲上不上意踟躕怕學退之號太華轉思靈境不虛來寶宇巍峨捨身臺登登如聞風霆吼九龍池上蒙霧開宛轉磴道一綫度盤壑通明洞天露中有

百千石真人精英常爲衆靈護緣崖更造清涼峯日氣懷懷同霜冬羣山羅列盡低伏似屏似笏難形容
西望一勞北員嶠目力直窮扶桑東吁嗟乎青鬢已斑白晝苦短陋彼向平遊尙爲昏嫁緩丈夫生不釣
利更弋名八荒九域隨所經恨不插羽上霄漢仰首倒捫辰與星劃然長嘯煩襟滌一脫纏繚放羈勒共
君伯雅浮酒鱗新詩濡墨題青壁但取快意人莫嗔留此欵側歸鴉迹回路俯瞰大海濤茫茫晚潮初月
白

靖海宋雍登槎山詩

不入此山久重來興欲迷雪殘幽徑滑天遠數峯低落日晴光滿浮雲海色齊扁舟如可泛更在暮湖西

萊陽董樵次宋伊水槎山韻

十載重遊客桃花渡未迷天隨青海關雁入暮雲低高下山惟石晴陰晝不齊朝來從杖履又過九峯西

董樵雲光洞詩

山水真佳事尋常不易經人來虛勝地吾意結茅亭懸榻低雲樹開窗近斗星修篁風細細留待月明聽
會稽何漣遊鐵槎山詩

峯影與雲連乘槎直上天蒼藤盤絕頂黃葉下飛泉苔蘚龍池畔煙嵐蜃氣邊偶然謝塵事來訪洞中仙
邑人于觀貞鐵槎紀聞詩

我聞西頂道半腰天梯陡手扳摩挲佛擦崖躡越走一蹉千丈崩口閉心跳口最上兩重殿穿井水清澗
不謂萬仞巔乃見乳竇剖迤北千真洞關始王仙手屈數或逸三幻猜不容扣延關四丈餘圓石屏遮後
次接九龍池龍窩疑若有其餘諸石怪哆口牽俚醜窟窿與夾板詰曲通戶牖石牢尤最下說石皆非取
極高清涼頂三石像傳久叩乃應銅鳴不似瓦拊岳每逢夏四旬香會進岱母緣東魚貫上牽挽應肩肘
竣事下西阪阪險屢盤踞沙滑以趨迅類杵投日東頂洞雲光仙竈燕沒帚處一昔煉燒丹成昇謁斗
再南號雲蒙深洞沈海勦舟行或見字水簾題門首元日水可退石珠驗風吼此皆山別派不列鐵峯九

文登縣志

卷一上

山川

十六

竭來適八月草深蟒蛇蟻否則峭卓錐骨秃松杪朽既莫磬登陟那徧署吾某聊復采此異垂紀比山壽
邑人林鍾岱遊鐵槎山詩

青山欲倒東南傾萬山辟易滄海裂誰架孤槎橫地來九頂撐空色如鐵我行欲到望轉迷羣峯高出中
峯低倏從地底穿絕澗更向石窟攀天梯盤迴千轉度平嶺仰視復與蒼溟齊懸厓欲墮不可躡直上惟
有垂藤接伏行兩股幾不支下臨冥洞心膽懾線路直共鷹隼爭捫蘿翻羨猿揉捷忽爾中峯落半天岸
花野草爭鮮妍開土幽居踞其下寶旛高倚天風懸捨身之臺憑危岫絕壑陰森山骨瘦背靡不登昌黎
號陰風獵獵鳴石竇俯瞰大海起橫波渾沌一氣空宇宙深山日暮遊人多更尋古洞窮巖阿峭壁峻嶒
一萬丈鏗豁石室如蜂窠千真傳神在阿堵龐眉虬目堆青螺夜靜露下侵鷲瓦長空忽見清光瀉翹首
驚異天欲明回顧月在千巖下須臾高出到山腰星斗慙慙皆堪把陡起烏雲青天陰星月黯淡煙雨深
龍池欲上不可得中峯已沒何處尋四顧滉漾翻雪海匆匆躡履下遙岑西路陡絕挂層嶂古磴盤迂入
煙瘴出入高下不見天卻從石底行石上緣坡小憩雨聲收羣峯競綠遙相向日夜所閱竟不同俯仰頓
覺增惆悵何時攜得驚人之句來共登絕頂排雲開西極咸池東若木淋漓墨瀋飛蒼厓丈夫行當逍遙
遊五嶽局促轅下胡爲哉君不見茫
茫碧海接天漢漢使乘槎去復回

管山在城西北三十里巍然獨秀有石洞三一在山麓洞口石齒嶙峋

上尖下廠深邃不可測執炬以往風來炬滅屢然屢息終不敢入中一

洞石門排列類雙扉陰霾晦冥遙望洞口噓氣成雲若吐納狀近峯之

巔又有一洞圓如環周圍無石亦無草木而滑澤闊平似履坦途時幻作樓臺亭榭奇卉林嵐須臾間變化無端蓋山市也

管山西北數里餘有山曰英武雙峰夾峙突落突起參差羅列有若關然又西北曰天馬山勢如天馬行空不可羈勒其東北小山曰小天層嵐錯疊蔚然深秀

朱紫山在城西北二十五里石髓中流出泥水皆朱紫因以名焉泥製爲器澤潤而堅叩之有聲

邑西北有七松嶺嶺皆種松故名其六嶺巋然而起古松鬱盤狀作龍鱗曰香鑪頂距城二十餘里有臺如鼎足峙立一曰老人臺高丈餘廣倍之有石類羊形俗又呼爲老羊臺臺側有石池口若巨甕水深二

尺許澄清甘冽經年不涸久旱池水溢出環流臺下三五日內必雨農人以之占雨恆驗

元葆頂在城西北四十五里有將軍廟不知建於何時雖漸剝蝕而甃石如砥神像巍然自山徑西下曰珠山亦有古廟又轉而西曰五廬頂鳥道峻嶒人迹罕到舊聞麻姑飛昇實始於此仙迹猶存山之巔霧常不散俗又呼爲霧露頂又西有一山相併傳爲黃巢平後逸曾曾匿此山山多怪異水尤腥穢

密山在城西二十五里東連木渚西接崗山幽巖秀石多奇形怪狀又有石名怖鴿崖如鳥之凌虛而翔也山之陽有石屹立相向日石門門之左右曰貉子洞野豬溝南折而東有石洞中闊可容百許人其上牡

螭殼旋轉錯出山故多狐晨夕間輒學兒語作雞鳴山中古刹頽垣不知建自何代舊有園址亦復荒廢邑人賽珠密山詩我愛孤峰秀開軒入戶櫺石屏蒼蘊蘊松蓋翠亭亭仙子掇瑤草幽人覓茯苓誰憐荒僻地載酒賦山靈

長學山在城西四十里漢鄭康成隱此教授生徒有康成講堂今爲聖皇廟山南卽元招討使刁通故里

岳山在城西南五十里

岳音節字書山曲曰岳府志作耙山誤土人亦讀作耙

山上石筍林立山北卽江

蘇巡撫徐士林故居士林晚號岳山老人以此南爲岳山口爲宋村諸處往西府孔道咸豐十一年修築圩牆以禦捻匪關門屹立形勢鞏固虎窠山俗名虎口山在城西南五十里木渚河南岸平地突起峻險峻

文登縣志

卷一上 山川

十八

嶒獨障木渚河下流有砥柱之勢山脈西亘岳山東控大海內無實土皆以怪石句鬪成形石多孔竇間雜青赤黃綠諸色山後有洞延闊丈餘旁穿小洞口狹而深或投以火其烟輒縷縷自山隙間出亦一奇也

邑人于觀貞遊虎窠山詩

虎窠玲瓏陡而截昔我嘗聽鄉翁說似言驅石秦皇時鞭笞蟄虬走捩狻遙指海門鬚爪張逶迤東下始一洩引頸吸水欵渴怒大河橫攔迴峯結石筍周環不知數透皺瘦筆難添綴巉岈破碎蜂窠同片石輕作鴻毛撇天根月窟一時穿踏足響答幽潛徹直北巉巖削不成懸崖萬鈞一髮掣背肋劈洞何深廣垂乳斑駁凹復凸紅如鑪鍛黑烟煤母乃燒天電光瞥不然神劍破雲飛夜斬重泉老蛟血豈有青蛇雙噴火穿窮地肺作陶穴或則女媧補天日鍊枯石髓山爲裂余向聞此頗掉頭好事有口譬一映自容橋南三月餘隔河夢遊纔歎絕卻怪常懷五嶽心而此不識眼眞劣今朝出覽果快然清泉煎茶容對啜忽憶去歲岳山巔立馬愕顧心早折改歲春殘到此遊采采幽芳薄言禩地僻人稀山更空幾曾慣停長者轍俗士相看無好詩翻惹林泉強饒舌我頗有奇思一題腹枵轉訝肘誰掣落日亭亭吟未成揖謝山靈暫告別

柰古山在城東北九十里威海司西東枕大海城踞半嶺故衛治主山也

古陌山在威海司北秀削如屏西北峭壁臨海下有洞名水龍窩狀如城門乘舟入蜃氣騰上不敢久泊歲旱洞起雲霧則雨其西又有旱龍窩口細如缶匍匐入內容數十人然炬照路百竅烟飛亦奇觀也又西北海中有巨石圓而色黑相傳明萬歷初隕星於此化爲石今名星石雕窠山在威海司東北六里孤峯特起人迹罕到惟雕育雛其上明季土人多避兵於此

松頂山在雕窠山西上平廠可容數百人明季避兵獲全甚衆

老鴉山在威海司西南三里天旱祈雨輒興雲黑如羣鴉故名又名喜雨頂

挂榜山在老鴉山側遙望如列榜故名

文登縣志

卷一上 山川

十九

佛兒頂在挂榜山東歲旱見雲生頂上即雨

裏口山在挂榜山西南明董指揮建蘭若於此其別業在焉饒臺樹林木之勝

明董祚昌山園記

威城之西逶迤而南復盤桓於東二十里許四面山合一徑斜穿飛峙流泉鳥啼花落四時堪怡不亞武陵桃源董氏裏口山園也董氏原籍南直濠州虹縣斗門村人先世始祖隨明太祖起義采石二世祖從成祖血戰漠北授明威將軍三世祖扶御駕北征遭土木之變沒於疆場四世祖於正統間外選威海遂世居威海焉海濱寥落隨分安居有宅一處在西門裏之南前後左右僅數十武修佳城於北山之廉脈脈頂下離城而西十五里買福德莊又東五里治別墅即裏口山焉於北海濱買田莊一處後分族氏居之此支相延五世此五處者皆歷威始祖所治屈指到威二百餘年相傳八葉朝代兩更此地尙爲董氏有甚可喜也亦可畏也五世祖於此山建菴三楹供佛飯僧六世祖赴都襲替甫授官即卒於京七世曾祖庵峯公尙在襁褓間賴祖父扶養而成優游泉石吾祖筠山公得之於晚年髫齡任事天性純良好植樹木不貪世業日日於此山修理田宅山園漸爲廣闊余父肖筠公未五十即致仕侍養二親因叔父葵陽公遊宦於鄧後陞武林卒年五十四吾父淡於此事視富貴如飄風驚電無足羨者齋素修真供佛建廟樂志泉石隨意花鳥以爲清賞辛卯歲季冬朔之十日預定去期寂然而復今而後爲子孫者生於斯寢於斯其所係綦重矣此地山峯無數乾地有佛兒頂峯頭圓靜半崖天際坎地有鐵拐山勢如雙髻飛瀑千尋良地有布袋菴古布袋和尚修養之所尙有石洞石塔遺址震地有鱗角口一峯聳天兩巖對峙

祇容單騎離上一山直插天表嶙峋異常白雲繚繞仙人出沒之窟古名牛仙山相傳昔年人牛俱成仙去坤山土岡透曲迴抱水口形如鳥舌鶴脰羅列其上兌山名小西天峯高難攀三摩淨地此皆天成地造非人力所能爲也山之勝不可盡數嵐樹巧於逞境果杪巧於蔽陰亭閣巧於據勝花草巧於承暎怪石巧於取態其樹則萬松鱗鬣千柞鬱蒼柏檜冬青柏油菩提楊柳柳椿之屬其石則六通一孔虎踞豹蹲矛頭劍脊之屬花草則梅花海棠牡丹芍藥忘憂丁香紫薇瞿曇葵菊玉簪紫荊耐冬刺梅鳳尾竹之屬亭閣則發真菴八角樓蟠桃宮奎星樓降魔殿長春洞翠虛洞慈悲池雙翼亭奉國祠來西閣樂真亭志善亭火德殿地藏宮白衣亭佛眼池觀音堂土地祠明威莊舍虛園此皆祖創其始吾父數十年來拮据而成者在山靜修三十餘年時時玩賞焉今奄然捐館果樹含淚野鳥銜悲其山嵐被火焚者二幸樹之大者尙擊翠蓋果樹卉草未免荒蕪亭閣泉池亦多傾圮余思樹有根水有源祖宗之物非可輕者今於損壞者略爲修葺使弗廢墜卽祖宗之手澤常存余於東嶺自築靜室一所名友誠居前建一杖亭後築倚雲齋擺脫俗緣以修淨業想從來產業能爲子孫有者至二百餘年喬木森森奕世緜緜者幾姓今薄山雖荒僻幸置海濱寂寞之鄉與兄弟管理之吾子姪當共念祖澤之遠勉爲孝子吾固知山園之常爲董氏有也噫古來名公大人修山園者亦多矣其山園之常爲子孫有也吾知之不常爲子孫有也吾亦知之蓋山園常在天地間也吾生若寄不常在天地間也姑爲之記以俟後之子孫共相勉旃傳之

永 永

金線頂在威海司東南二里康熙間守備李標謂巽地高聳利於科名建塔其上半截而廢光緒九年築魚雷營於此

文登縣志

卷一上

山川

二十一

蓮峯頂在威海司西里許

貓頭山在威海司東北形如臥貓江南人呼爲貓女山

文筆峯在威海司南一里爲 文廟案山 國朝貢生夏士彥等建塔其上

仙姑頂在威海南竹島寺之西山距縣城八十五里羊腸迴折最爲險

境俯視北海宛在目前四顧羣峯皆如部婁有郭仙姑廟宋景德四年

遼人所立碑詳寺觀

丰山在城東北二里屹然如屏爲一邑主山山下卽縣城

文山在城東北一里一名文登山召文臺在其上寰宇記古老相傳秦始皇東巡召集文人登此山論功頌德因名

按元和志文登山在文登縣西北九十里一說崑崙山一名聞登山亦無九十里古書傳刻多訛當以寰宇記齊乘爲是

明尚書王思誠文山懷古

崑崙雄跨東海邊盤桓百里勢繚延嵯峨不知幾萬仞七十二峯青摩天關西神師舊修煉烟霞洞啓猶宛然古來麻姑亦隱此三見滄海變桑田渺茫有無果可信父老至今相流傳秦皇漢武信方士東遊幾度求神仙世間那有不死藥海中誰獨長生年翹首東望鷄鳴島石橋龍口橫蒼煙

臨淄王瀛文山懷古

鹿走中原幾劫灰召文還時舊秦臺功成自勒金泥頌運去誰興麥秀哀壁謝瀉池狂猷歇椎驚博浪屬車回誰知朱雁興歌後早有銅仙下淚來

昌樂閣學海文山懷古

石危徑細倚孤筇上到巉巖第幾峯控海軍容屯虎豹隨潮雲氣幻魚龍赤松遺迹眞堪訪綠髮仙人未易逢惟有二三山風力遠隔林吹過午時鐘

邑人賽玉紘登文山有感

鶯語春風度愴然樹杪行四山團野色兩水抱孤城黃石終埋姓丹砂可避名秦宮何處是但見暮烟橫

邑人呂琨文山登眺

登臺春暮望此地一爲雄海幹蓬萊北山根大白東文章星宿聚道法古今同碑碣曾無字翻能眼界空

邑人劉儲鯤文山懷古

兩水彎環處人家浸碧虛山從鞭石後文亦劫灰餘老樹秋烟暝寒花晚照疏秦碑竟何處臨眺幾躊躇

邑人林鍾岱登文山詩二首

文登縣志

卷一上

山川

二十一

不盡探幽興屐痕穿碧苔殘碑留漢篆老樹抱秦臺風靜松花落雲開野鶴迴拂階閒坐久曠矣絕塵埃豈有阮儒者而爲召士謀從來留古蹟我輩足周遊野曠千峯出天空一雁秋祖龍杳何處風雨海東頭

香山在丰山西爲縣城後障亦曰北山山多古冢纍纍如北邙有泉曰香水其西南爲香巖寺因山得名也

五魁山一曰五峯山在城西三里舊名橫山宋家河郭家河抱龍河於此合流山當其衝爲下流關鎖橫列如屏堪輿家謂之挂榜山 國初知縣李蔭澄築五頂於上蓋取五魁之義人因呼曰五魁山邑人宋啓元壽李明府序力補橫岫龍氣由以祥昌謂此山也

五箇頂在城南十里五頂相連尖峯峭削舊志南去十里有石羊口東去十里有廬山

鳳凰臺山在城南三里爲縣城案山

豹山在城西南三里北對五峯山南曰豹山汪有明時銀礦洞
文筆峯在城南五里明天啓初知縣石三畏建塔山上崇禎十一年知
縣韓士俊重修石刻鮑春鼇記 國朝嘉慶辛卯賽學激重修道光十
五年光緒二年相繼重修

棋盤山在城東南三里石上有棋盤故名

崑崙山以東之水莫大於木渚河崑崙南北諸峰之水皆入焉又東出
於著棋山西麓者爲宋家河出於駕山西麓者爲郭家河縣城數十里
內外岡阜諸水皆入焉出於丰山者爲抱龍河縣治左右諸水皆入焉
三河合流西南入古橋河出於駕山東麓東北入海者爲柘埠河縣東
北諸山之水皆入焉出於李家山迤西鳳凰山千佛山諸山南流入海

者爲高村河縣東南諸山之水皆入焉出於縣東南大小架子山大小
坡石南北水道諸山西南流經湯村二馬宋村迤南入海者爲湯村河
此皆經流也其溝瀆溪澗無關地輿者不載

木渚河亦曰母豬亦曰黑水上流亦曰古橋河在城西南三十五里上
源出於陽里店巴山塹者爲板橋河自三十里堡東南入焉其出於縣
北五十里半壁山者爲王家河流經王家產村東又西經于家營李家
莊南又西經荒裏村大宅庫村東又南與劉家河合流劉家河源出縣
北五十里韓家山流經阮疇白鹿村東又西經白鹿店嶺西村南王吮
集北又西與王家河合流南經英武村東黃埠村西又南與古石河合
流古石河源出縣北三十里黃兒山流經小黃村楊格莊厓子頭山馬

鮑家山馬于家汪格莊白玉莊諸村南又西諸源合流爲古橋河又南
經管山村西又南經汀峽汪村西又南經密山東崗頭河入焉又南經
姜北頭西長學山東又南經撇簞山西又南經山前村西院東村東于
疇河滾龍河自西入焉又南經王新莊東周格莊西昌陽水自東入焉
又南經橋上村西折而東爲木渚河經虎窠山北姚山頭南又東經東
西碛灘南又東入於海

按自縣以西之水莫大於木渚其實會衆流以成巨浸自橋上村以北至管山古謂之古橋河今通名
木渚而古橋河之名遂湮自虎窠山折而東方名木渚其水深黑吐納海潮故亦曰黑水崑崙山以東
縣城以西諸水皆入古橋河由古橋河入木渚河一統志縣西南六十里有
古橋河源出白鹿山南入海不知古橋河爲木渚上游入海者爲木渚也

送駕河

當作宋家

俗名柳林河在城西三里發源邑東北四十里著棋山西

麓流經草廟集南又西南流經洪水瀾北又西經許家屯北又西經高

文登縣志

卷一上

山川

二十三

格莊南又西經留章村南又西經北牀村南又西經九里水頭村西折
而南又西南經賽家莊東又西南經柳林村東又西南經五峯山南與
郭家河合

郭家河在城南一里俗名城南河舊誤爲抱龍河源出城東三十里駕
山西麓流經張皮村南又西南經營南村北又西南經七里河村南又
西經涼水灣畢家林諸村南又西經東關南又西經縣治南抱龍庵後
又西經西關南又西經西樓村南又西經五峯山前又西與送駕河合
計長四十餘里其合流之處有文星石俗傳水衝石見其年科第必盛
齊召南水道提綱郭家河出文登縣東北山即駕山西南流經縣城南而
西會縣南一小水即抱龍河又西會東北一水即送駕河西南流有母豬當作古橋河

西北自崑崙山來會又南至五壘島入海新登州志誤以郭家河爲抱龍河

抱龍河在城南門外爲縣治內界水源出丰山西麓西南流過石峽經申子墓又南經文山西麓又南經東門外望海橋下又南至城東南隅折而西經八蜡廟後又西經抱龍橋下又西折而北經城西南隅西流經壩頭園後西樓村前又西經五龍廟前又西匯爲五龍灣今又西入送駕河新登州志誤以抱龍河爲郭家河

自明及國初以來修志者不知郭家河之名而移抱龍河之名名之於是抱龍河無名新登州志雖顛倒其名而二河並存未泯其迹王歐二志刪去一河幾於湮沒矣

舊登州志城東河在城之東源出丰山西流入送駕河即抱龍河也雖敘次疏略而其時西流而不南流灼然可見嘉慶庚午邑人金鏞著鳴谷小識曰抱龍河自南門外而西其時猶循故道自嘉慶二十三年山水泛漲抱龍河南隄衝塌決入郭家河兩河並流六十餘年光緒十七年知府江澍昀按部至文親臨河干相度形勢首先捐銀七十兩並諭紳士勸捐堵築決口挽水西流規復故道以完風氣未及興工大

文登縣志

卷一上

山川

一二十四

雨驟至河水暴漲泥沙俱下南河之沙北衝北河之沙南壅決口數尺頃刻填塞自是水勢西趨自尋故道而河身年久淤塞流勢不通一遇霖霖終恐泛溢知縣許源清籌制錢一百五十仟發商生息以爲挑挖之資自製碑文以記其事

登州府江札文登縣知悉照得該縣城外向有護城河一道嗣因年久失修以致淤塞本府於今年正月親至該縣勘明確爲風水攸關亟應挑挖規復舊制以通文脈而裕財源業經本府倡捐足銀七十兩作足大錢一百仟文以作興工之費惟查河身湮沒沿河一帶耕種之家侵佔居多自宜照舊退出以便興工除出示曉諭並知會該縣紳衿設立護城河工局妥議章程籌款興工務於本年三月內一律蒞事凡辦理事宜概由紳捐紳辦外合行札飭札到該縣立即遵照並將發去告示六張飭役張貼又照會八分分致各紳從速籌辦如有霸佔河身恃強不讓及藉端阻撓者仰該縣即據實稟明以憑究辦仍將興工日期及辦理情形隨時稟覆察核切切此札

此札雖下甫及興工而因農忙停止河身淤塞仍然如故知縣許源清重修護城河記 光緒辛卯十二月

文邑舊有護城河一道發源丰山繞城而東而南西折與大河爲一彎環曲屈回抱有情堪與家以其形勢有殊謂爲闔邑文風所係自嘉慶年間山水陡發由東南決入大河數十年間故道遂廢邑人久欲復之以紕於賞而終不果光緒己丑予蒞茲土閱城池亦惜其久而就湮擬欲復修適邑紳衿吏曹主政王君書年函致鄉人屬爲開挖故道衆議僉同遂於辛卯二月邀集邑紳捐贊興工塞者疏之淺者濬之自城東挽之使西鑄鍾所施清清洽波光周匝工竣計寬七尺深五尺隄寬二尺長三里奇河之隄身一復故制仍議築壩於城東南隅以杜舊決適以農務方殷而止是年秋大霖雨河水暴漲飛流湍急沈沙淘汰俱盡而昔時之決口復淤與事之人樂其事半功倍以爲得天之助而請記於予夫斯河之修預卜文風之盛及此人人力學以應山川鍾毓之奇聯袂登雲固可指日而俟爰記數語以敘顛末兼爲之

籌撥歲修錢百五十千作修防
固隄之用以期其經久不廢也

古石河在城北三十里山麻埠村北發源村東北黃兒山流至村北有大石數枚橫衝水中每天雨輒激薄作海吼聲自村北而西又西南流二十里入古橋河

板橋河在城西北四十里有二源一出縣西北陽里店北山一發源於店西之巴山塹共會於板橋村南與劉家河會流經三十里舖東南入古橋河計長十餘里

劉家河源出縣西北丫角山流經靠山村遠莊店子頭泊子村魯家埠張格莊板橋村南與板橋河會計長三十餘里

城西河在城西三里卽送駕河郭家河匯流處西流經湯后村南廂兒

文登縣志

卷一上

山川

二十五

于家如意湯

俗名七里湯

亦北麥畝后諸村北又西南流經徐格莊西廟山

以東石灰窰南北馬諸村之水自東來注之又南流經雙石村西小牀村東又南流經套河莊東折而西又西流經潘格莊南青龍亦北又西南流經河格莊南荆格莊北又西南流經臧格莊南草埠村北又西南流經周格莊南又西入古橋河南流入木渚河

齊乘昌山在文登西南三十里昌水出此山因氏焉南合黑水北納昌陽湯通名昌水西南過萊陽會五龍水南入於海昌陽湯極清温在文登西七里名如意湯

按齊乘此條謬誤殊甚以昌水出昌山一誤也以如意湯爲昌陽湯一誤也以文登之水四百餘里而會萊陽之五龍水三誤也原其致誤之由以漢縣爲晉縣不知漢之昌陽在文登晉之昌陽在萊陽文登有昌山而昌陽水不出於昌山萊陽有昌山其昌水卽出於昌山以文登之山而牽扯萊陽之水以萊陽之水而附會文登之山總由於漢晉之縣未能分清疆界耳一統志通志府縣志皆沿其說而不知考則齊乘之過也然齊乘雖謬而文登之昌陽水湮沒旣久別無可證惟其中南合黑水北納昌陽湯通名昌水三句敘次了然則今湯村河下流西南入木渚河其爲昌陽水明矣刪節其文不使與萊陽相混則九域志文獻通考所載之水得其源委矣續山東考古錄曰齊乘不詳考水道稱此水南納黑水北合昌陽湯通名昌水南過萊陽會五龍水入海所謂昌陽湯者又誤以縣西之七里湯當之蓋

不知漢昌陽城在文登以晉縣爲漢城遂臆揣而爲此說其實昌水與晉縣所臨之水一東流一西流中隔大山無數絕不相涉謬已甚矣近志無不沿其謬者

柘埠河源出縣東北黃菴山由小駕芥七芥村寨裏村樂家店與榮成界溫泉湯會合五珠河東流入海計長二十餘里

報信河源出縣東北碑口嶺流經西子城報信村堆前村河北村橋頭集爲文榮界河北流入海計長二十餘里

高村河源出城東三十里駕山東李家山鳳凰山天福山諸處經流獐子山岳家泊高家泊生地村西南經大河村西南臺至團山匯爲老龍汪西南經山後孫家東至行駕山于騰鼇墓西又東經林家山下過鶯嘴石南流經孫家埠西呼雷湯東至高村集西由嶺上村南經鼇山橋東南入望海千八港計長七十餘里

文登縣志

卷一上

山川

二十六

昌陽河俗名湯村河卽古昌水源出縣南大小架子山大小坡石東南流經南北迎寺橋西又西南流經車臥島西又西南流經南北崖子村南又西流經田家牀村南又西流經畢家牀趙家牀村南又西流經河南洪家村北又西流經初家莊北又西流經湯村店南又西有古昌陽湯在河之北岸今在河中又西流經大澤頭村南又西流經石羊村南二馬村北又西流折而南入鱈魚港元豐九域志文登縣有昌陽水齊乘南合黑水北納昌陽湯卽此是也

田滋河源出縣南曲屯莊南北申格莊南流經回龍山東小鑪村西又南流經臺上村城東村東又西南流經石羊村北又西南流經林家莊又西南流經宋村集南又西南流九頂埠郭家店之水自北來注之又

西南流入鱈魚港

滾龍河在城西南四十里會韓家莊北山及上口北山之水南流經下口村西又南流經又河村西又南流經赤金泊西長學山以西之水自東北來注之又南流紫金山之水自西北來會又東入於古橋河其水汜濫無定故名滾龍每來時嗚嗚有聲衝毀又河赤金泊諸村良田無算

通志邑西南四十里有白龍泉河舊志不載其卽滾龍河與附以俟考

澤頭河在城西南五十里源出崑崙山南麓東流經崑山後宋家徐家二村南又東流經多藍埠南又東流經澤頭集南又東流經升格莊南又東流經島口村南又東流入木渚河

文登縣志

卷一上

山川

二十七

通志邑西南五十里有惠民河舊志不載疑卽此河雍正間河水暴漲澤頭集受害尤甚知縣王一夔爲築隄禦患村人立長生神位至今祀之惠民之名或一夔所命與俟考

楊庭河在城北七十里發源艾山北麓流經楊亭集港南孫家灘西棗豆口入海計長十餘里

徐家河源出縣東北車馬嶺流經東陽村王家河楊家灘北流入海計長三十里

石頭河在城東北九十里威海司西南遶城而東環流入海卽古石落村之石落河水源自桃花嶺來涓涓長流伏雨滂沱則大石浮出取之不盡

舊時衛城之水自南門外直東趨海無彎抱之勢康熙間守備李標築隄障水使東北入海自是科甲迭興今則隄堰衝毀水復東趨矣

五龍灣在城西三里五龍廟西南金元時禱雨輒應今淤

鶴子圈灣在城西南四十里有水洞深不可測

李九灣在城東北二十五里郭格莊莊人李九有廢疾不任操作妻某氏婉而賢爲人服役以養九九自知疾不起乘間投灣死妻出而葬之葬畢至其夫溺所亦入而死鄰人具棺合厝之因以李九呼其灣云邑增生陳道原李九灣詩殉夫處水一方水面嬉泛雙鴛鴦李九名灣九不朽九非婦殉名奚彰曹娥漢孝女抱父浮錢塘秀夫宋忠臣負主投東洋何意乞婦識大義與夫同葬雲水鄉流芳長欲爲表烈名氏亡但見李九灣中青鏡光

豬牙灣在城西三十里赤金泊東泊田多汗下雍正間知縣王維幹欲鑿渠洩豬牙水入木渚河以田多諸姓有貧者掘之則敗業難之邑人

文登縣志

卷一上

山川

二十八

林樹屏別莊在焉慨然曰當某田處盡以爲渠不足惜若當他人田某請以善田計畝償之王大喜渠遂成一村食其利時田文鏡爲河東總督講水利也

墨齋
隨筆

甘泉在城西三十里甘泉寺通志水自石穴出味甘冽

馬蹄泉在靖海司南里許四圍渾石中間形如馬蹄潮至四圍皆鹹中仍甘美可飲

蒙泉在威海司西北出石窟中水潔而甘大旱不涸土人取以釀酒號小惠泉

如意湯在城西七里二泉並發一熱一涼俗名七里湯元山東副使王貢易名如意康熙辛丑知縣王一夔甃以大石爲方池兩頭有孔引泉

脈自上孔入池浴則塞之浴畢則啓下孔放水出覆以瓦亭繚以垣牆有門南向設湯夫四人以時滌除謹守門鑰俗名曰官湯道光七年知縣范興榮重修今圯其東爲民湯牆陰有邑人劉樾蓓溫泉詩石刻其西數武又有溫泉一繚以垣俗稱女湯郭緣生續述征記東萊有溫泉恆沸鳥墜輒爛

齊乘昌陽湯極清溫在文登西七里名如意湯圖經文登有溫泉七所此爲最以昌陽湯爲如意湯誤

范興榮重修如意湯記

溫泉之說朱子釋沂水猶疑之余宰文邑而知其說之果不謬也邑西七里有一泉焉溫涼並發出於自然前人創置小亭更名曰如意公餘遊覽其間見石刻題詠甚夥但年代久遠風雨剝蝕敗壘頽垣零落已甚以茲名勝豈容委諸荆榛乎爰鳩工修葺復其舊規有池澄然有亭翼然有垣屹然願與我士民共遊於春風沂水中也是爲記

江都吳肇煌溫泉詩

暖氣生暘谷清聲起碧瀾水雲疑鼎沸山火欲燒丹按脈流何急尋源境自寬開襟新沐後風雪不知寒

王一夔溫泉詩

脈脈源通何處邊丹成勾漏豈知年溫生暘谷雲如沸氣洩清流火欲然白石日曛山徑暖蒼苔風透水波煙四時迭見寒暄易長布春和是此泉

文登縣志

卷一上

山川

二十九

昌陽湯在城南三十里

寰宇記作四十里

漢昌陽縣之東十里今淤塞舊志以爲

湯村湯蓋俗名也寰宇記昌陽湯周迴十二步南

當作西

流入黑水卽此

湯今湯村河中流一處獨溫冬日可浴蓋湯爲河流所併也

呼雷湯在城東南四十里水亭三間光緒九年重修王志凡病寒溼瘡瘍者洗之輒愈

按字內溫泉見於水經注者十之八九多云可以療疾洗瘍而愈不獨此湯也

洪水瀾湯在城東北二十里一名新汪湯又名車家湯年久淤塞同治

間土人於故湯之西南半里許鑿方池甃以石繚以垣水較故湯爲熱

池中有魚蝦色微赤置之涼水則立斃故湯今名老湯灣

溫泉湯在城東北五十里柘埠河中四面寒水而此處獨溫水流不滯

浮垢盡去清若鏡甘如醴凡湯皆有磺氣飲之輒作惡惟此湯可飲農夫力作困憊飲此則疲者忘倦四體舒暢心曠神怡湯之北有溫泉寨卽宋之溫水鎮以泉得名今入榮成縣

按湯泉可飲者他處亦有之水經注南陽魯陽縣溫泉出北山湯側有石銘云皇女湯可以療萬疾故杜彥達云然如沸湯可以熟米飲之愈百病道士清身沐浴一日三飲多少自在四十日後身中萬病愈三蟲死學道遭難逢危終無悔心可以牢神存志據此則溫泉不獨洗瘡且可愈內疾然無敢嘗試者恐砒石爲虐也寰宇記文登縣都有溫泉七所以今計之如意三湯合以昌陽以下四湯仍符七所之數博物志凡水源有石硫磺則溫或云神人所煖主療人疾溫泉紀略略天下溫泉一十九處楊慎丹鉛錄予在南中所見溫泉甯州白崖德勝關浪穹宜良鄧川二泊凡數十處而安甯爲最清澈見底垢自浮去不積且無硫氣舊有人見其竅出丹砂數粒乃知其下有丹砂傳聞徽州黃山溫泉亦類此後周王襄溫湯銘云白礬上徹丹砂下沈乃知溫泉所在必白礬丹砂硫磺三物爲之根乃蒸爲暖流耳本草綱目有砒石處亦有溫泉大興朱珪豫乘識小錄云硫磺係陽氣入池遇陰凝結而成者故其性慘烈各山溫泉多有硫磺氣者傳其下卽磺礦云

舊時縣境三面際海島嶼星羅南走淮揚北達遼左頗稱要衝自東鄙分設榮成惟南北距海而最爾荒島可以停泊舟楫者蓋無幾焉其海

文登縣志

卷一上

山川

三十一

口昔闕而今淤者亦有之矣備述於左

邢家島在城西南六十里其南有港曰小旺子西與甯海接界 李島王島皆南距小旺子爲捕魚之所 桑島在城西南四十里南濱海東西距港島西即木渚河下流北有陸路可通宋村集有田可耕居民數十家在北者曰桑島其南爲泃島又南爲高島墨島島中牡蠣最佳殼生海底與潮上下名曰滾蠣

廢鐸嚙曰桑島牡蠣之美甲於一郡顧其殖不繁得之亦艱歲晚務閒漁人始乘桴以長竿鉤致剖殼取肉至水澤腹堅則鑿冰爲孔而索焉率皆熟習水性者始能致之乾隆某年牡蠣大稔索者俱盈筐而歸於是近島男女老幼莫不履冰求之比及來春東風將解迨冰未泮並日而營一日衆集冰上可百餘人各俯其首穴冰求之彼此絕不相顧忽冰之周遭俱斷竟成一數里巨壇人俱踳踞其上俄而東風大競砉然以解百餘人乘冰南入大海渺不知其所之矣

邑人寨珠桑島海市詩

君不見登州海市誇三齊拔地撐空掉神奇又不見登州刺史蘇公詩放開雄筆走蛟螭市也詩也兩奇絕碧海鴻章爭輝赫六百年來事已空風流佳話誰續說僕也長生不夜里以蠶測海吁可鄙竭來港口

遊灘邊青天萬里東風起黑島濛濛桑島沒變作珠宮連貝闕疑是秦皇使者徐市還三山仙子載滿缸
又疑東海之神呈水戲魚龍鬣衍隨雲氣我聞文登古登州海市之觀史冊留恨無賦手追前哲鼓舞海
若凌瀛洲彼耳食者安足語但說蓬萊閣下海市傳千秋

邑人劉儲鯤桑島燒蠣詩

四野團秋光蒼茫廣斥道雲林互蔽虧蜃市人擾擾礪房乘潮來岔湧桑墨島門生把酒瓶奚奴背乾草
不用漑釜鬻連殼付火燎啖之清心脾天然味更好西施舌尖嫩江瑤柱根老其餘衆蝦菜一筆都堪掃
潮頭看一線羣山勢傾倒大聲發水上阿誰鐘鼓考一嘯來天風冷冷傳海嶠老鶴作人語喋喋雲霧表
蒼然暮色至新月在林杪俯仰已陳迹雪泥印鴻爪絕勝玉版師貪饕笑枯槁

五壘島在城南六十里卽齊乘之五壘山山西爲海口春夏之交漁者
雲集魚商多泊舟購之 甕島在五壘島東內無居民 姑嫂島在靖
海司西三十里海中有二石相隔里許相傳有姑嫂投海化石海市多
出其上 蘇門島一名蘇山島在城東南海中北距鐵槎山四十里山
海經蘇門日月所出島名本此或云南與蘇州相對故名東西十餘里
南北三四里四面環海爲鹵氣所蒸無樹木不生五穀惟多荒草春夏

文登縣志

卷一上

山川

三十一

彌望青葱秋冬則黃茅白葦徧覆嶠嶼有海神廟三楹道士一人供香
火不敢演劇尤禁婦女入嘗有乘舟往試者將至則怒濤洶湧急返棹
乃止劉儲鯤詩潮打蘇門島嶠岫水石聲暝色孤舟上披蓑釣月明蘇
門之北爲張濛島內無居民皆常見海市處 延真島在城東南一百
里海中上有營壘故址 蘇心島在城東南海中其側又有雙柘島
環石島在城南海中內無居民 裏島在靖海司東內無居民 竹島
在城東北八十里舊名竹島寨寨址尙存 劉公島在城東北九十里
威海司東水面十里元史作劉家島亦作劉島舊傳爲海上劉氏別業
明初魏國公徐輝祖徙島中居民於近郭嘉靖間海賊王憲武造房五
十三座據而有之御史藍玉督汎兵逐之丈耕其地萬歷末年知府陶

朗先復招人開墾納稅兼設墩臺中峯之嶺官兵戍焉內有廟祀劉公
劉母莫知其所自始舟人經其地必致祈禱光緒十五年北洋大臣護
軍統領張文宣重修

王志劉公島產方竹棧刃密節堅勁異常此臆說也啓堂隨筆澄州出方竹說邪誤澄爲登好事者遂云
產自劉公島安矣余詩云勁節棧棧狀不侔舊傳方竹出澄州豎儒妄改金根字試向陳編子細求
威海教授王蘭生劉公島詩

傳說桃源洞阮仙緣巧相逢快一時須臾百歲了又聞說廬山雲煙深繚繞髣髴夢中遊恍惚不可考
孰如東海上子子劉公島十里絕塵埃清遠譁鸞少飄搖水上浮鯨戴無傾倒神龍常呵護魑魅不能擾
可望亦可尋一帆達山表煙火數十家斷連村落小雞犬聲相聞比鄰共昏曉高下多田疇行歌藝茶蓼
富不連阡陌貧亦堪煖飽萬頃斥鹵中甘泉賽珍寶汲來清且馨烹茶釀酒好晨起觀曉日燦爛紅光燦
有時海市現變化何竊窺誰見神仙府三島十洲渺此間卽洞天悠然愜懷抱我於其中結小廬長與劉
公稱

二老

邑人劉儲鯤劉公島詩

秋水長天色登臨盡大凡濛濛開夕照葉葉下風帆橫笛吹明月飛聲上紫巖釣鰲吾老矣贏得換頭銜

日島在劉公島南一撮如缶浮於中洋春夏常有海市 黃島在劉公

文登縣志

卷一上

山川

三十二

島前稍北有青島黑島皆無居民 石島在威海司西十里潮退可通

行人 楮島在威海司西北海中內無居民 姚山頭海口在城西南

八十里窰頭島下一名窰頭口久廢舊志有遠島寨城疑卽此處

靖海司海口在司西一名龍王廟口小船可泊 柳埠海口在靖海司

東南二十里久廢 朱家島海口在城東南一百里俗名朱家圈小船

可泊 琵琶島海口在城東南一百里島無居民口亦淤塞船不能泊

長會海口在城南六十里海船自南而北赴張家埠口者必經此灘

淺僅通魚舠口門東有靴兒石怪石陡立其南凸出如靴下有洞幽邃

黑暗無敢深入者洞外有石屋滑淨如拭中爲石桌可容數人弈酒又

有三岔汪海口今不知處 張家埠海口在城東南五十里商船可泊

光緒十四年東海關監督設稅務於此 馬頭嘴海口在城東南一百里
里有山如馬頭故名籌海圖編謂之路家馬頭海口今淤僅通魚舠其
東接榮成界 雙島海口在城北七十里今淤僅通魚舠其西爲雙島
港元設雙島巡防官 長峯海口在城東北八十里久廢 威海司海
口在司東商船可泊
羊角港在城南四十五里 邢家港在城西南六十里俗名小汪子
千八港在城東南六十里北至順天南至江甯水道各一千八百里故
名廢鐸嚙曰元時海運避成山風濤之險輒艤舟於港陸運於北海再
由海船放洋至界河口港東有黃華山設關山巔曰黃華關以星使籌
運於此故名

文登縣志

卷一上

山川

三十三

按元史食貨志載海運之道甚詳由千八港撥運至北海之說元史無之然史又云風濤不測糧船漂溺者無歲無之間亦有船壞而棄其米者蓋成山多礁石一遇風濤最爲險惡有時舟不敢行自千八港陸運至北海再入海船遇險則出此非常運之道故不載於史也

斜口港在城東南一百里 大汎港在城東南一百里 鹿鬪口港在
城西北六十里 麻子港在城西北一百里 石島港在城西北一百
里

文登縣志卷一下

古蹟

舊志不夜城在縣東北八十里元和志作八十五里今入榮成縣東牟故城即今寧海州治元和志在縣西北一百十里道里正合寰宇記脫去百字齊乘因之王志未考以為在縣西北十里誤又腫城即今福山縣治寰宇記在文登西北七十里清陽水側近與之眾山相對清陽水即福山東門外之內夾河文登縣至福山一百八十里寰宇記脫去百字又誤八作七文登西界只五十餘里實無腫城方輿紀要亦沿寰宇記之誤以腫城入文登縣今並去之其在縣境者著焉

昌陽故城漢縣莽曰夙敬亭在城西南三十里漢書地理志昌陽縣屬東萊郡成帝封泗水戾王子霸為昌陽侯後漢書琅邪王京傳永平二
 年以東萊之昌陽益琅邪而郡國志仍屬東萊郡後漢省不夜縣入之魏屬長廣郡晉初省入長廣惠帝時復置昌陽縣於長廣郡地則今萊陽縣是續山東考古錄昌陽縣故城在文登縣西南三十里後漢書光

文登縣志

卷一下

古蹟

一

武十王傳章懷注昌陽故城在今文登縣西南寰宇記萊陽縣前昌陽縣理在文登縣西南三十里昌陽故城是也齊乘昌陽故城在文登縣西南三十里晉初無此縣元康八年復立昌陽縣屬長廣郡今萊陽縣是也

方輿紀要以漢縣誤入萊陽

按今縣西南三十里有古城基在昌山南昌山今名回龍山山之下即故昌陽城土人訛為康王城城北曰臺上村東城外有村曰城東城西即宋村集有廟土人名曰康王廟疑即漢昌陽侯霸廟也南城外曰石羊村有社稷壇遺址各高一丈五尺土人訛為康王墓昌陽訛為康王蓋晉之轉王歐二志均未詳考按名勝志引城家記云康公城在牟平東十里即田和遷康公處又二十里為清陽城即今福山縣治此牟平指漢之牟平縣言在福山西北三十里其地濱海康公卒即葬海上今福山東北海中之眾山有康公墓康公城墓在文登於古無據山東通志亦沿府縣志之訛而不能辨今考昌陽城有四一統志引古書而不斷通志斷之而不明後漢書光武十王傳注及寰宇記齊乘所載晉元康以前之昌陽則在文登界一在今萊陽縣東七十里其地亦有昌山昌水今入海陽縣界在縣西八十里昌陽故城晉元康所置昌陽縣是也一在萊陽東南二十五里齊乘謂隋大業間築唐永徽初為水壤寰宇記所謂廢昌陽城是也一為今萊陽縣治舊唐書地理志永徽元年移治古城西北二十五里是也後唐改曰萊陽自唐迄宋元文登之昌陽古書確有明證自明以來志書訛謬考核不詳昌陽與昌山昌水並失之又詳見山水

靖海廢衛在縣南少東一百二十里本漢昌陽縣地北齊以後爲文登縣地名普菴郡明洪武三十一年分置靖海衛 欽定皇輿全覽東北自衛五里至老軍屯接文登縣界南自衛一里至海東自衛二十里至鐵槎山接文登縣界西自衛半里至海 國朝雍正十三年裁衛歸縣威海廢衛在縣東北九十里 欽定皇輿全覽本漢東牟縣地唐以後爲牟平縣地金元爲甯海州地明初入文登洪武三十一年析辛汪都三里置威海衛北自衛八里至海南自衛八里至接官亭接文登縣界東自衛一里至海西自衛五十五里至初村莊接甯海州界雍正十三年裁衛歸縣

康熙二十年闔衛紳士留衛條議

爲酌議去留之便以深未然之防事竊照邊海設衛原以防海而威海一衛則枕接劉公島海口彎環曲

文登縣志

卷一下

古蹟

一一

抱容納萬艘爲南北咽喉東距成山衛一百餘里南距文登縣九十里西距甯海州一百二十里北則盈盈滄海一碧萬頃是以明初設操軍二千餘名明末設營兵二千五百名我朝又調防文登縣營千總一員營兵二百五十名協理戒備大率專爲防海備倭起見原非設衛設官專爲徵收屯糧計也且設屯養軍止以屯其地者卽食其食原無起科徵解之例鼎革以來軍去屯存而佃耕屯地者始輸納屯糧因屯係衛地故加衛官以兼理之責前衛海之有專城專官固非屯存與屯亡與亡之說可弛防而撤備也近奉上檄督議屯地屯糧欲併鄰近州縣以專責成誠爲時至事起之正論但恐屯地一去則衛官權輕衛官權輕則裁衛裁官之說必有起而議其後者 國初裁衛之議屢屢矣其議裁而卽裁者同城之衛有衛官而無衛學者也如登州衛之歸併蓬萊縣甯海衛之歸併甯海州亦既裁之而不疑矣其議裁而終不果裁者如威海衛之孤峙於北海成山衛之孤峙於東海靖海大嵩之分峙於南海星羅碁布永爲保障者亦既留之而不疑矣今以議屯之故而釀成裁衛裁官之漸豈無妨於封疆海口久安長治之計乎且威海之不便議裁者尤有說也設衛之初卽設衛學作養官軍子弟以爲培植人才之助建燹宮崇 聖像設教授典至重也 國朝因之挺然各立庠校今使屯可併也衛亦可去也學亦可散卽令不散而附於鄰近州縣學之後使堂堂俊秀補廩出貢各出一路功名之士一旦而委之爲流離瑣尾之子猶或可忍也儼然 聖像而委之荒烟蔓草之中亦不足傷乎且衛無居人諸生卽居人也衛無丁諸生之子弟卽丁也前于逆猖獗官率諸生子弟守荒城拒狂敵總恃人心爲城之力若裁衛而改學則諸生子弟亦去衛而就食是無衛卽無衛學無衛學卽無衛人無衛人則窮荒遐陬之地勢必有空虛叵測之慮矣故屯地屯糧可以去可以不去而衛城衛官乃必不可去終不可去者也懇祈伏查前情轉呈上臺輕重緩急之間細爲斟酌何去何留永爲定例庶不以更張之端貽事後之悔矣

知縣王卹留成靖二衛詳文

看得成山靖海二衛一居東北去縣百二十餘里一居東南亦去縣百二十餘里二衛雖無漕運然俱係

邊海要地實與邊衛無縣可併者同非可概之直隸各省諸屯衛也明季之時衛因縣轄官民俱受其累自我朝順治十六年始將縣衛分管迄今相沿二三十年屢經議併而不併者皆我國家防海之計網繆未雨之深謀也此固不具論即曰錢糧可徵是也但兩衛離邑寫遠往返維艱若一議併勢必催糧者呼應不靈納糧者比較違誤以至點卯過限道途之費一年倍於正供民力幾何其堪此耶則錢糧亦未易徵也即曰地畝可核是也但兩衛屯地有在他州別縣數百里外者若一議併而縣境內者可核縣境外者亦可核乎况軍民混雜民地入於軍戶軍地入於民戶疆界不清爭訟不已則地畝亦未易核也即曰逃盜可清是也但兩衛地方遼闊坐鎮有人巡緝難諉若一議併鞭長不及馬腹之虞豈無在苟乘間竊發者乎豈無匪類潛藏莫識者乎及至事露貽害匪輕則逃盜又未易清也此併與未併利害較然故以縣治衛不若以衛治衛之爲便也况自有衛以來建立學宮俎豆無替今當熙朝崇儒重道之際如懷遠永甯諸衛無學校之處尙有議復之美政而忍令三百年之巍巍聖學鞠爲茂草使邊海文風之不被其澤乎此又讀書士子更所未便者也今行查酌議合無詳請憲臺轉詳惟仍舊制之爲兩便耳爲此具中伏乞照詳施行

登州府留衛詳文

據萊陽文登二縣及大嵩成山靖海三衛反覆敷陳不便裁併訖且又據各衛士民連名公呈歷陳風土形勢追言創制始末極言利弊是縣衛兩議固所僉同而士民公論又皆劃一則大嵩成山靖海三衛似當俯順輿情仍然舊制以留爲便者也惟據甯海州先既詳稱威海一衛實與裁併之例相符而該衛則稱裁併不便有入兩相互異隨行該州一併確議雖據該州逐一議覆但裁併未免更張其間調劑稍有未善必貽地方之累是則威海一衛合無亦仍舊貫爲便然事關因革各衛應否裁留卑職未敢擅便憑據該州縣衛查議前來相應據實核轉

雍正三年閩衛紳士留衛公呈

文登縣志

卷一下

古蹟

三

爲存留要地以重海防以安邊鄙事竊威海一衛距登郡極東東接高麗南通日本琉球北達奉天天津島嶼聯絡劉公島最險爲江浙七省通商要路貨船停泊海寇劫掠每從此發竄文之屏蔽登郡之門戶而帝都之咽喉也西去甯海州一百二十里南去文登縣九十里與在內衛所附近州縣者迥乎不同是以前朝於軍屯而外復設備倭等員駐防並守夫有所用之也我朝定鼎以來聖德普熙海外賓服一切衛所概奉裁革獨於威海屢欲裁而仍留蓋知有所不便也近奉部文遵旨議併著督撫分別詳細區處具奏伏思威海衛據東海要衝州縣鞭長不及甯福水師兩營皆有防海之責者然甯兵不滿三百汛兵墩堡三百餘里水師戰艦登郡膠州分防止有十隻更番巡哨南北奔馳二千餘里而海寇窺伺來如風影如康熙四十二年及五十一年卒然乘虛所至風鶴向非衛守督率兵丁晝夜巡護比及兵將合聚東郡之憂恐未有艾是威之爲衛東海第一要地正宜整頓以備中外安可議併况我朝重道崇儒威雖蕞爾聖像在焉先帝御製匾額巍巍懸豎作何安置更當斟酌生等世居海濱就中利害敢不直陳儻蒙採擇疏請存留不惟萬年之金湯鞏固亦濱海貧民所賴以爲保障者也冒昧瀆陳伏候憲裁

邑廩生王庭槐裁衛記略

雍正十三年河東總督王士俊行部至登諭意屬員欲裁併邊衛整頓封疆登萊青道董自超登州府于斐及該管各州縣四衛守備望風承旨不敢異詞各衛士民紛紛具呈牢不可破靖海觸怒尤甚拿送甯海州監禁以奸匪論罪山東巡撫岳濬洞知情節礙難掣肘總督王遂題請將成山改爲榮成縣大嵩改爲海陽縣威海靖海疆宇紳民俱歸文登而學校生童威海則附榮成靖海則附海陽學額合新縣原額文武各十六名威海現廩俱改爲候廩除貢則榮威兩學各較食廩年分二年一貢學官令巡檢局固封守祭祀改爲朔望行香乾隆二年因人戶以籍爲定又將威海靖海學校生童俱改屬文登學額照文登之舊祇十五名本學王兆聖戚傲澍呂濬王兆興李昂在榮成績補現廩又改爲候廩出貢則文威靖三學較

年分二年一貢三年秋學院李光墀知府陳法特賜垂憐行牌筋萊甯文榮海五州縣詳查欲防靈山鰲山一衛之例另立字號入學幫補除貢而相繼離任遂成畫餅五年夏學院徐鐸深為惋惜慨許事竣具題後亦不果六年冬奉上憲明文查裁衛便否本衛士民不得與聞而歷年呈詳各案當事一概不錄遂寢謹記願未俾後世有所考云

召文臺 欽定皇輿全覽縣東一里有文山齊乘作文登山寰宇記故老相傳秦始皇東巡召集文人登此山論功頌德因名縣志後人建召文臺於此乾隆三十一年重修邑舉人賽學泌撰碑

邑增生宋允和召文臺記

文登縣城東北有文山古名文登山挺然獨秀爲一邑冠高齊天保八年置文登縣蓋因山以取名焉山上有臺高丈餘廣倍之臺之北爲屋三楹爲遊人憩息之所額曰古召文臺書法蒼勁年代莫可考矣按樂史太平寰宇記秦始皇東巡召集文人登此山論功頌德不言有臺則此臺當爲宋以後建因始皇之遺跡而以召文名之史記秦始皇本紀二十八年東行郡縣上鄒嶧山並渤海以東過黃腫窮成山登之衆立石頌秦德而去三十七年始皇出遊自琅玕北至榮成山榮成山卽今榮成縣東之成山始皇兩幸成山文山其必經之路登山頌德事或有之而二十八年上鄒嶧山與魯諸儒議刻石頌秦德議封禪望祭山川之事浮江至湘山祠大風不得渡召博士問之則秦皇登山召集文人時有之文山召士不載於秦紀史舉其大略其細故有載有不載文山召士之說樂史以爲故老相傳非必子虛烏有也臺之東南隅有文星石高三尺廣尺有五寸石之前刻魁星像奇古有神爲萬歷舉人鮑捷來鐫石後刻萬歷四十

文登縣志

卷一下

古蹟

四

二年知縣王培植文脈禁令謂文山乃文邑祖龍民命文運攸關如有在此取土取石者罰土千擔樹千株考萬曆季年縣令王姓者蓋許州王家棟也石舊在臺下南牆陰光緒丙子訓導周榮程移於臺上臺之側銀杏三株左一右二大數圍高數十丈枝幹皆作虬龍攀拿之勢卽吳都賦所謂平仲葉似鴨脚者一名鴨脚樹公種而孫食又名公孫樹土人呼爲白果樹三樹夾臺侍立霜皮如鐵黛色參天似數千年物登斯臺者摩挲徘徊當不勝盛衰興廢之感云

桐城方根本召文臺詩

秋山多白雲潔山如沐颯颯涼颯發黃葉脫林木乘風上高臺草徑路盤曲日落千萬峯峭壁孤烟綠鳥聲天半來蟲吟花底伏時復尋清流芳泉手可掬觀茲山林趣曠然豁雙目我愧風塵客琴書指一束十載事奔走以心爲形蹙而我抱逸志泉石興亦足朗吟山之巔長嘯山之腹顧瞻麋鹿羣何爲自局促斯臺建秦代彷彿留遺蹟召士頌德功德功非足暴焚書與阮儒况乃肆其毒千秋百世心書生猶痛哭我今懷感傷登臨動遐矚事業同灰燼臺名後人錄

吳興沈嘉麟登召文臺詩

三春登眺處千古召文臺海氣吞仙島山花笑劫灰天連高樹盡雲度遠峯開獨念羈棲者今多作賦才

鄭司農講堂舊登州志在縣西三十里長學山漢鄭康成授徒於此有書堂遺趾邑人賽珠曰長學山以東諸村皆名鄭家莊爲漢鄭司農寓居故里

按後漢書鄭元傳元高密人家貧客耕東萊學徒相隨已百千人自萊州以東至海皆漢東萊郡地今諸縣別無康成遺迹長學授徒之說固可信也名勝志漢司農鄭元曾隱長學山開館教授生徒今有書院遺跡漢無書院之名蓋康成講學之處後人名以書院耳又三齊記略康成居不夜城南山中教授又伏氏記崔焱王經康成弟子康成教授不夜南山遭黃巾亂與之揮涕而散不夜城今入榮成縣蓋亦康成教授處不夜南山今之古蹟頂也

京口劉鑑長學書院詩

司農曾此誨羣英築室山頭教鐸鳴嶽麓清風堪並美鵝湖高致可齊名鱣堂日久雲常鎖巖舍年深草自生千載湖中流出水琅琅猶帶讀書聲

邑人畢羣長學山懷鄭康成詩

山色清如沐當年舊講堂經傳毛氏傳地擬鄭公鄉芳草縈書帶晴雲翊石房餘風千載後猶賴道源長

優老堂在西門大街路北卽太子少保叢蘭故宅門之左右有坊左曰銀臺正德元年爲蘭官通政使司左參議建右曰總制正德九年爲蘭總制宣大二鎮并偏頭甯武雁門等關軍務都察院右都御史建世宗登極蘭屢疏乞歸賜敕褒諭內有優老之語遂以名堂河南道御史卽墨藍田有記今爲叢氏宗祠西爲萬歷丙子舉人鮑捷來故居今其地

文登縣志

卷一下

古蹟

五

猶名花園

藍田優老堂記

優老堂者太子少保大司空叢公之堂也今皇帝入繼大統之初公三疏請罷政歸老上優詔慰留嗣歲公之春秋六十有七歎曰年至矣復屢疏辭益堅上乃許之而猶難其去賜璽書褒飭之給驛還鄉令有司歲給祿米三十六石輿隸四人以爲常近時大臣致政雖間被恩數未有如是之盛者也公旣奉璽書歸文登鄉之士大夫登公之堂賀公而曰請以璽書中優老之語名堂曰優老所以昭上恩而播宇內也公曰吾出入中外惴惴於憂途畏境今也豁然若有所需而獲之也若有所負而釋之也上之恩優我至矣吾何足以堪之有作而言者曰古者養老之禮隆而待士之恩厚有虞之燕有夏之饗有殷之食有周兼用之蓋其服食起居與凡動作無不待於養也後世斯禮廢仕於四方者齊力旣愆土思益切無田以給伏臘無屋以蔽風雨由是以官爲家者或有之必候適於言數於事厭薄於人而後去不惟士之自待薄而上之待士者亦薄上下之間不能無憾豈古今人誠不能相及爾耶觀吾皇獎恬優禮之詔公守禮秉義之疏千載一時可謂兩得之矣敢舉爵爲公壽又有作而言者曰公嚮屢奉璽書將使指北經邊關西踰秦隴南撫徐揚而又常督兵開闢於上谷雲中足迹半天下舉劾封駁之力經國救時之策禦寇保民之績咸有規式載於史氏晚參留務而樸茂清白克勤小物久而不渝蓋一時稱名卿才大夫者必歸於公焉奉身而退超然物表易曰時行則止則止公得之矣敢舉爵爲公壽又有作而言者曰往者權倖竊柄士習漸卑鑽隙抵巇營謀依違沈酣寵利鳴璫服黻無復廉恥之色者比比皆然吾皇更化之初起遣佚簡俊又拔廢屈顯勞伐元卿碩舊罔不問存而公際斯辰也空谷之駒莫留在陰之鶴寡和豈固忘吾皇哉亦懼盈恥競焉耳吾皇優其勞以勸弗勞優其清白以勸弗清弗白斯吾皇勵俗之心而公全智之秋也敢舉爵爲公壽後二十二年公之嗣子國學生馨訪於大勞山澤中謂田曰優老之堂吾子

記之嗟乎末學晚進何足以知公而記公之堂哉伏念先公與公事敬皇帝同爲臺諫事毅皇帝同爲九卿公督關中邊餉而先公提兵公督漕運而先公理鹽法及先公屢疏乞休得俞旨歸卽墨而公設祖帳於黃河之濱慨然歎曰公先得歸矣我亦尋當訪公於勞山水石間也田以子職恆侍公側辱公教舊矣世譜之誼不敢固辭堂成於正德某年某月公歸於嘉靖壬午二月記作於癸卯十二月後之登斯堂而誦優老之靈書者可以自省矣

瑞麥亭在崑崙門外西郊嘉靖庚子邑人叢磐田中麥秀兩歧以爲豐

年之兆卽其地建亭三楹額曰瑞麥知縣王允言撰記今圯土人呼其

地曰茶棚

亭乃叢磐建事見漸陸編新舊登州志俱謂王允言建誤

王允言瑞麥亭記

文登旱蝗歲相接嘉靖戊戌秋七月予尹茲土復值霖雨連旬山川漲流上田皆不登予甚憂之己亥夏五月或持兩歧麥告予曰得自道旁不知是何地產予曰奇哉茲邑豐年兆也是年果豐邑崑崙門西郊太學生龍灣叢君莊也龍灣穫麥見僕夫插雙歧麥於首問之云主翁地生此麥數十本偶此插首餘悉礫亂於碾石下矣龍灣以麥示予且於茲地建亭三楹以瑞麥匾其額是年果又豐龍灣邀予及邑彥造亭上酌予曰昔張堪爲漁陽令麥秀兩歧而來民之頌今吾邑生此堪符芳躅矣實明公德政致然也敢以爲明公賀予曰草木以雙爲瑞若連理枝並頭蓮合歡果雙頭花載在典籍而可稽獨兩歧麥爲豐年之兆尤有關於民而可喜者上則吾明天子德澤洋溢召天地之和而遠及於海濱下則吾文登之民必

文登縣志

卷一下

古蹟

六

有孝子悌弟碩人貞婦和氣以致祥當爲吾君賀當爲吾民賀予何與焉若究論之又當爲主人賀蓋天之生瑞麥也固爲一邑豐年之兆然擇地之旺者而生猶人之誕貴子也固爲一族將興之禎亦必擇支之善者而誕其理一而已矣今瑞麥獨生於龍灣之地固茲邑年豐之兆則龍灣之地必其地之旺者叢氏之福其可量與龍灣諸子秀發不凡文思山出聯登桂籍固理之所有者他日果符是應予將走慶龍灣於瑞麥亭

萬卷樓在望海門外文山之麓萬歷間邑人劉必紹於宅傍建樓貯書

自爲記曰盤古至今歷世如彼其遠也天地至大六合如彼其無外也

萬事萬物之蹟學者能考索經子出入典墳博觀野乘逸編天地古今

在吾目中矣自入仕途常祿之外不敢苟得除充日用贍親友餘者卽

以易書邇來所積將近萬卷故以名樓吾子孫登是樓閱是書也經術

世務吾書備載吾樓備藏體此以明明德推此以新民純此以止至善

戴天履地而爲三夫復何愧也今廢

鯉堂廣宇記石落村劉氏海濱得百丈枯魚骨構鯉堂續夷堅志石落村劉氏嘗於海濱得百丈巨魚取骨爲梁構屋爲鯉堂堂前一槐蔭蔽數畝劉忽夢女冠自稱麻姑乞此樹修廟劉漫許之後數日風雷大作昏迷如夜失槐所在迹之則已臥麻姑廟前矣今威海巡檢司舊曰石落村邑諸生于觀貞曰威海城西奈古峯下有小溪多石相傳卽石落村魚骨尙存城內關帝廟

甯海州志古蹟考亦載鯉堂謂石落村卽州之石頭河村無魚骨梁爲證恐屬附會

仁和行人蔣祝鯉堂詩

我聞北溟有鯉魚化鵬振翼凌太虛又聞吞舟亦漏網洪波出入縱所如莊翁寓言十八九史遷比類疑何有異哉威海有鯉堂可續齊諧志怪後憶昔巨魚遊海東噴沫震動馮夷宮九天雲垂海欲立乘風抉石聲磴礧須臾浪靜天吳歇知是揚鬚怒不發遠山蒼翠列如屏滄海茫茫浸明月嘘吸元妙幾千年龍荒以外遊無邊一朝奄忽隨物化飄泊泥沙殊可憐首尾蜿蜒千百丈劉公號衆衆鼓掌紛來割取血淋漓狼籍脂膏浮潏瀝脂膏割盡骨空存架骨爲梁鎮廟門壯繆有靈應一笑留此奇蹟奠乾坤郭公纂人威海志老夫展卷訝異事赤鯉何不化龍飛雷電燒尾雲端戲吁嗟巨魚骨已殘雲煙繚繞佳氣蟠丈夫不作梁棟用對此魚骨空長歎

文登縣志

卷一下

古蹟

七

邑人于觀貞鯉堂懷古詩

城郭層陰碧蘚繁叩金地主杳何存仙風久斷槐花雨澗水平流石落村牧笛飄來傷寂寞寒鴉啼後靜黃昏誰憐弔影魚梁月尙挂西峯奈古痕

環翠樓明宏治二年指揮王愷建於威海衛城西北角大學士劉珏作

記 國朝順治間守備于有光重修康熙間圮乾隆元年復建樓下爲

望月臺

劉珏新建環翠樓記

威海西城之岡有樓曰環翠以滄海山川之勝甲天下山光水色映帶於前而我朝來恃此爲邊陲太宗皇帝永樂間益修守禦倭寇不敢伺覲有此備也歷世百餘年城池崩塌兵政廢弛因循弗理適欽差巡察海道副使趙公鶴齡至四顧歎曰城池如是不重治之後必有大患乃整飭之以憲度振肅之以綱紀起附近州縣人夫數千名支給泰山香錢數百兩多方設法將威海等衛雄厓等所三十二處赤山等巡司二十處鳳凰山等墩龍虎山等堡四百餘處甲冑干戈之屬政令乖戾之類一旦煥然一新東海之人傾心向化倭寇聞風遠遁軍民安堵皆公餘澤所及文登營把總指揮王愷等感公之德捐俸建樓以示永久因稟命差遣總督備倭都閫姚公昇曰事貴適宜奚爲不可於是不遠千里謁文於余欲刻石用圖不朽吁近海之郡凡幾濱海之郡凡幾自唐宋以來民之至而土著者日益繁元末苦於攻戰過者蕭條興歎今聖天子深仁厚德被乎東裔若易而不難也大抵繫乎人而已且時之不可爲者春秋書新延廢

是也制之不當爲者春秋書新作南門是也今修築既得其時又出於政之所闕是豈可沒而不書耶遂次其概如此使後來有所考云

文登守備劉正學題環翠樓詩

威海城東盡登樓四望開青山橫地出碧水捲天回雲樹浮蒼翠鳶魚任去來風光無限好卽此是蓬萊
桐城彭塗詩

一色蒼茫環翠微平明淑氣藹清暉城頭桃李春爭艷眼底雲山興欲飛石石仙翁今在否祖洲瑤草事全非臨窗共作高樓眺不盡東洋戴月歸

邑人呂曰正詩

頻年愛作謝公遊今到璇臺最上頭萬水東流歸大海羣山西接到神州潮噴孤島圍城市雲罨荒城結作樓欲覓仙蹤何處是公然此地有蓬邱

邑人王澤九日登環翠樓詩

登臨勝地豁雙眸况值重陽景物幽烏帽落時開嘯傲白雲深處許句留菊逢陶令添佳色山對王孫憶舊遊路出西巖同挹爽蒼烟天際露重樓

憑欄一望海門秋攜手還登最上頭山抱晴光臨晚節雁拖寒影度荒洲寄君雅興花三徑消我煩愁酒一甌出處升沈何足道聊將心事付閒鷗

關隘

文登營在城東十里一統志明宣德二年建初在縣西門內十年遷此

文登縣志

卷一下

關隘

八

有土城周三里東西南三門營當東面之險

土城今圯止南門存焉按明設三衛以備倭寇三衛各處一隅不相統屬宣德間建營蓋以地當三衛之中南去靖海東抵成山北至威海各相去百里內外設把總爲營官多以指揮爲之蓋以節制三衛聯絡聲援非以其地當東面之險也一統志誤

嘉靖以後倭患既息萬厯中改把總設守備 國初因之順治中立中左右三營改設副將都司守備千把總等官時值于七之亂土寇蜂起踞崑崙山爲巢穴營設重兵鎮以宿將爲土寇也承平旣久山海無警兵馬裁撤殆盡矣今爲都司專營

宣德間設把總一員中軍等官二十三員旗軍一千一百四十名原額馬四百一十四匹正統間調去京操馬一百五匹餘存營立爲馬步二十二隊萬厯二十一年改爲守備府設守備一員中軍一員哨官一員

通志順治五年文登縣設守備營仍明舊制防守沿海地方十八年改設副將立中左右三營每營領以都司守備千把總等官共馬步兵三千名康熙四年每營裁馬一百匹改爲步戰兵又裁中營步兵二十八名左營步兵一十三名右營步兵一十二名五年全裁右營官兵卽將所裁之兵補中左一營原裁各缺仍足每營千名之數六年兩營共抽調馬步兵二百名赴泰安營防守七年共裁兵一百一十七名十九年改左營另爲甯福營駐防甯海州改中營爲文登城守營仍以副將轄守備千把而裁去都司至二十三三十四等年續裁馬步兵共一百八十一名存營馬步兵共六百六十名屬本鎮總防雍正元年抽調馬步兵二十二名歸充鎮標九年改守備爲都司今定制本營副將一員都司一員千總二員把總四員外委千總一員外委把總三員馬兵一百三十名步兵五百四名

乾隆四十七年裁馬守兵七十名四十八年裁守兵二十八名

嘉慶二十一年裁撥曹州馬步兵三十七名

道光十二年裁撥回疆馬步兵十三名三十年改爲水陸副將裁馬步兵一百三十四名

同治元年裁撥濮州營馬步兵十三名七年調赴烟台洋鎗隊馬步兵九十一名八年暫行開除步兵五十五名十三年裁汰二成合八年五十五名共裁馬步兵七十七名

今定制馬步兵二百十三名 存營汛馬兵二十五名步兵六十名 文登縣汛馬兵五名步兵十七名

榮成縣汛馬兵六名步兵三十五名 靖海司汛馬兵四名步兵三十二名 海陽縣汛馬兵四名步

兵二十

五名

演武廳在營東二里周三里有堂有分閱廳有旗幟廟

舊志載營中軍器火藥等件咸豐間征剿粵匪發用殆盡已經報銷故不復載

靖海巡司在城南少東一百二十里明洪武三十一年置靖海衛通志城臨於海邊在岸之東南城內有巡檢司駐劄自南而北一帶平岡正東有鐵槎山嵯峨高聳正西隔海遠望見五壘島自西南以至西北皆汪洋大海水深一丈爛泥底近岸淺處皆鐵板沙底海口甚寬但旁多礁石僅可泊五六艘避東南正北東北風蘇門島在鐵槎山南去海岸

文登縣志

卷一下

關隘

九

四十里可容四十餘艘馬頭背陸路三十餘里至舊靖海衛海口西南有馬頭山雲光山西有鐵槎山西北一帶平沙北及東北有齊山延真島環繞東南臨大海岸上有地村落居民三十餘戶口外水深三丈餘東北海中有三石礁宜避口內水深一丈五尺俱鐵板沙可容數十艘避大風惟東南風浪巨不便灣泊

靖海衛及甯津所舊轄六十三屯在甯海州者一在本縣者六十二舊設墩二十座堡八座礮臺三座今俱廢

威海巡司在城東北九十里明洪武三十一年置威海衛其東十里爲劉公島通志劉公島懸處海中東西長二十里廣六里東北有二海口水面寬闊舟楫俱可往來隔水兩旁皆有高山環映正東臨大海有礁石出海里許正西乃威海衛城有巡檢司駐劄島上有新墾地三頃居

民三十餘戶島下水深四丈黑泥底可容百餘艘避正北東北風由島而西直通威海衛諸山環抱水面寬闊深二丈可容百餘艘避颶風洋船往直沽遼東者過成山頭必於此停泊然後開船乃要津也光緒九年創辦北洋海軍其後設提督一員統領全軍操防事宜歸北洋大臣節制調遣設威海行營以爲提督辦公之所置綏軍鞏軍護軍魚雷等營機器等廠

大連灣旅順口威海司膠州澳爲北洋屯泊水師口岸

綏軍四營光緒十三年設正營在北竹島副營在南竹島左營在北門外後營在天后宮後

鞏軍四營光緒十三年設中營在溝北村前營在城子村右營在百尺崖所炮隊營在海埠東亦

文登縣志

卷一下

關隘

十

護軍二營光緒十四年設在劉公島

魚雷營在金線頂光緒九年候補道劉含芳築

新建礮臺五座一在祭祀臺一在黃泥溝一在山島紅俱光緒十五年建一在劉公島一在黃島俱光緒十六年建

威海衛及百尺崖所舊轄屯十八處在甯海州者十四在本縣者四舊設墩九座堡四座炮臺二座今俱廢

邑中沿海多土寨似廢城而小考明史兵志洪武十七年湯和築沿海諸城二十三年建五總寨於甯海衛共轄小寨四十八蓋其時未立衛所防海之兵皆屯於土寨今南北濱海尚有存者榮成志謂爲毛貴所築

誤

崑崙山石城因山勢爲之邑中陸路關隘祇此咸豐十一年徐州捻匪東竄文榮兩邑就隘設防各村鄉兵皆自備糗糧輪番戍守九月初九日賊大舉仰攻忽海霧四塞彌滿山岡賊自西望之如數萬甲馬屯聚

峯巔環山草木盡如伏兵遂大懼而退同治元年公議修築石牆防守山口計南北長牆一百六十餘里甯海之東鄙及文榮兩邑借資保障同治六年捻首任柱賴蛟光張總愚等由泰安博山竄萊州已抵萊陽棲霞海陽甯海諸縣而不敢東犯者石牆之力也山高路險一夫當關足敵數百計大小山口三十六處在甯海境者十之七在文登境者十之三而天設之險惟文登得地利焉甯海處山之西而文登處山之東故也

由南而北起自西橫港唐峪口又西北三里至鈴山口又西北三里至崑山口又西五里至斗口又西五里至青山口又西北七里至鳳山口又西北八里至土門口又東北十二里至出道口又北一里至滑石菴口又西北四里至狼尾口又西北三里至孫家口又東北三里至趙家口又東北七里至虎山口又北二里至馬石口又北三里至盆圓口又北一里至章皮口又北三里至介巴口又北四里至燕石口又西北六里至黃華口又西北二里至拖拖口又東北一里至姑子洞口又東北一里至橫當口又西北七里至梯子口又西北四里至寨門口又東北二十里至曲家口又西北十五里至殿后口又西北二里至單

文登縣志

卷一下

關隘

十一

耳口又西北八里至福峴口又東北十五里至孟亮口又東北三里至紫峴口又東北六里至新海口口各爲門閉之則東西不通其山脊缺陷處築石爲牆借資保障爲大口者五曰崑山口曰青山口曰章皮口曰福峴口曰新海口自南海起至北海止實共一百六十四里自孫家口東南至海諸口爲南口北至崑崙山諸口爲中口自崑崙山東北至海諸口爲北口

邑人孫其昌西山防堵記

同治六年歲次丁卯五月既望文榮以僻處海濱不見外事麥秋既至農忙登場無他虞焉客有自西來者曰濟南境內捻匪擾攘羣以其言無稽置無問越三日有謂賊逼臨淄界又越二日聞卽墨戒嚴又越一日萊陽福山之民有驚懼而東奔者於是邑之人愕駭不知所爲計或曰兵家首重地利形勝可恃莫如西山西山者邑境之崑崙山也奇峯疊嶂東海諸山莫大乎是山之體南盤北折自南海至北海百六十有四里山之口路險勢阻自西橫港至紫峴口三十有四區山之左枯木朽株可備炊爨爨山之泉洩注不竭可屯竈壘山上大石礮小石礮可礮山中之木堅多節科上槁可揭爲竿斬爲兵衆議僉同勇氣百倍於是積糧於山之阿鳩工於山之頂半也而鑿爲池高也而築爲城其積土也如隄之防其累石也如金之固當是時山海環列得地利矣闔邑同心得人而和矣賊抵甯海境意欲東犯軍書急於星火干戈嚴於風霜農夫棄耰耨而執矛盾士子廢詩書而習劍佩鳴金擊鼓旌旗蔽天西山之守極嚴而賊乃望風而遠遁易曰天險不可升地險山川邱陵王公設險以守其國文榮兩邑非得地利與西府同一蹂躪已矣迄今承平三十年桑麻雞犬安堵無恙誰之力與書其事俾後來者得考焉

津梁

賜谷小識曰文邑山重水複自昔設有石橋間有冲損飭令修補無難也其間木橋尤多夏令曰十月成梁况近海早寒之地哉鄉村各有會薄責成均在會首惟示期限分別懲勸勿任稽延以累治理則

往來行人遵路而歌
蕩平者不能已矣

望海橋在城東門外原名會仙橋抱龍河之水自丰山而下橋首當其衝嘗爲水圯道光間重修 新建橋在城南門外一名抱龍橋抱龍河自城東南隅折而西流經橋下咸豐四年光緒十九年相繼重修橋南卽抱龍菴俗名觀音堂 崑崙橋在城西門外原名迎仙橋橋之南北舊有濠通名西濠北受香山之水年久失浚亦漸淤塞惟南濠存焉

蘇家河橋在城東南三里光緒十二年監生邵廷梅建 何家橋在城

東二十里 新莊橋在城東三十里 路公橋在城南十五里渾石造

成長二丈厚五尺擊之鏗然有聲石鐫承安五年信士路大翁造

王志古蹟

門誤承安作黃龍歐志作永安今改正

礮山橋在城東南四十里乾隆十五年臥龍山道士

文登縣志

卷一下

津梁

十二

張和正周德善募建縣東南諸水會於高村河過閻王鼻入海其西北別派則自礮山港東注入焉道士募金鳩工築橋港口長十一丈五尺廣四尺五寸東西馬頭共四十一丈五尺有碑存焉 普渡橋在城西十五里順治二年邑人于應第建道光間孝子隋淑源重修 偃馬橋在城西南二十里順治十六年邑人鄒其山建 管山橋舊名通濟橋在城西北三十里木渚河上游邑人王廷輅王玠捐建 廣濟橋在城西北三十二里邑人孫一成建又三里爲登雲橋亦一成建 陽里橋在城西北五十里陽里口東爲北路往來孔道長三四丈舊名吳家橋咸豐間生員劉宗向約王所楫等勸捐修築 迎仙橋在城西五十里東華宮下元至治間東華宮道士耿道清築橋之兩端鑿石爲將軍鎮

之俗呼爲將軍橋有至治二年碑 駟馬橋在威海司南街雍正八年重修 李公橋在威海司東門外康熙間守備李標建 新建綏軍大橋一在威海城南河下游一在威海灘東際光緒十四年北洋提督建

風俗

東萊人尤樸魯

隋書地理志

人皆樸魯淳直甚者失之滯固然專經之士爲多

宋史 民多樸野性皆獷直凡有施爲質多文少

元史地理志

士好經術俗尙禮義

廟學記

近海早寒商賈不通傳習聖人之書男耕讀女紡織人罕逐末俗

尙幽貞質掩其文有葛天氏之風

天啓志

婚禮不用樂喪儀一準家禮士夫家不作佛事亦不拘陰陽風水家言停柩緩葬故家世族皆建堂以時致祭他如佳節令辰歲時伏臘東土

文登縣志

卷一下

風俗

十三

習尙大略相同舊志瑣書茲概不錄

上之所教謂之風下之所成謂之俗韓昌黎曰風俗與化移易吾烏知今不異於古所云耶道有升降俗有汗隆習俗遷流古今不同舊志所載各據一時言之耳統而論之邑中風俗唐宋以前靡得聞矣參稽史志大約樸魯爲多金源之世文教大興大定明昌間登甲科策仕版者彬彬郁郁質有其文一變榛狉之習元初不行科舉豪俊之士多出於軍伍披堅執銳奮志功名雖經李璫之叛亂而見幾勇退不入其黨大節炳然如刁招討馬百戶之儔秉直不回猶存古道明代政教重士賤民家遵詩書之訓士以氣節相高服官者有政績可書隱居者以著述自娛甲申之變篤志守貞或攀鼎湖之髯或採西山之薇垂芳志乘實不乏人視金元尤盛矣

前明以少保叢蘭郎中林洙參議宋廷訓知州劉必紹稱爲四君子蘭以經濟顯洙以清節著宋劉服習理學身體力行餘澤所被薰染良深延及 國朝百餘年間封疆大吏勳業爛然出宰百里者亦慈惠可師蓋至乾嘉之際流風猶未艾也

廢鐸嚙日明之末造政煩賦重民不聊生往往棄其田廬客死異域甚且投身著姓甘爲奴僕以避徭役因而巨族世家田畝徧野積重不返久假不歸入 國朝來縹戶之民類皆佃田自給其間奇才間出不屑苟安北游燕冀南走江淮交易起家懋遷成業數十年外富等陶朱旣富方穀教子成名再世而後紆紫拖朱居然世胄而欒卻之族降爲皂隸別業山莊多歸崛起大抵邑中舊俗專事耕讀而牽車服賈則乾隆間初開石島海口南貨雲集逐末者衆又至咸豐六年烟台通商耕植之氓多揮鋤而負販懸犁而持籌人多地少勢使然也

鄉民畜牛頗蕃山田磽确與鹹鹵不可耕者村莊所共名曰牧場或一二村一場或三五村一場萊夷作牧舊俗然也有希圖獨占者則必興訟執持元明舊契四至影響邊界不清官一左袒則公輸私鬪往往

拚死相毆釀成命案宰斯邑者以牧場之案與南方墳山同一束手若相其村莊之大小畜牛之多寡秉公酌斷使各有可牧則亦相安無事

惡俗相沿有不可解者天旱不雨則視新墳有裂縫者指爲旱魃剖其棺而擊之名曰打旱魃雍正乙巳志已載其說蓋由來久矣光緒二年夏旱則擊套河莊于姓之尸火焚之而不知其大千例禁王志詩大雅旱魃爲虐朱傳云旱神也未聞有人死爲魃者神異經言南方有人長二三尺袒身目在頂上行如風名曰魃所見之國大旱又名旱母遇者得之投溷中乃死旱災即消亦未有人死爲魃之說歐志今例載指稱旱魃創墳毀尸爲首者照發冢開棺見尸律擬絞監候如訊明實無嫌隙秋審入於緩決若審有挾仇洩忿情事秋審入於情實爲從幫同創毀者改發近邊充軍年在五十以上仍發附近充軍其僅止聽從同行並未動手者杖一百徒三年邑中舊俗每歲旱輒視新墳土有微濕者指以爲魃聚衆數百人掘墓開棺磔尸碎骨偶值天雨羣以爲驗訟至公庭按律治罪俯首無辭愚俗無知自陷刑辟可爲太息也山阿古寺自春初二月起演戲賽神市易牛馬並莊農器具等名曰山會秀民賭棍支搭帳房呼盧呵雉引誘愚民小者傾家大或激成命案因而奸匪竊盜溷迹其中肆行偷劫嘉慶間經御史林鍾岱條陳上聞 飭山東巡撫嚴辦至今猶然莫能禁也

林鍾岱查辦匪徒疏

竊臣籍隸山東之登州府僻處海濱百姓習於勤苦素安本業近竟有爲民害者臣謹舉二條爲我 皇上敬陳之一匪徒搶劫地方宜嚴行懲治也登州山多地僻易於藏奸聞有匪徒成羣結黨身帶鐵尺繩鞭尖刀等物搶劫集場鄉民目之爲起手又名爲趕白集即白撞手之類鄉民受其害者或因距城遙遠畏見官長或恐益以守候之苦有妨農務往往隱忍甘受間有赴官稟報者而地方官所差捕役即係窩賊之人平日資其餽送多方爲之包容以至愈集愈多肆行無忌臣聞嘉慶十五年匪徒張起山王十于十松喜子狗二劉二等聚集多人在文登榮成兩縣地方搶劫市集七月間榮成縣民人孔姓在崖頭集

文登縣志

卷一下

風俗

十四

被其所殺經孔姓母妻控官地方官因係孤子無人上控並未認真查拏是歲十月文登縣屬之高村集開設大市之期此夥匪徒復率領七八十人明執器械強入市場村民告知汛弁帶領弓兵彈壓方得無事十六年因匪徒日衆莫能防制遂將市期停止文登地處極東不通商賈自停高村大市之後鄉民諸多不便現竟又有劉二馬二等各聚多人在高村外樹林中支搭窩鋪往來棲止或暗竊或明搶遠近均受其害惟縣屬之宋村集每逢市期村民設人於村外把守藉此少甯究以民人不得擅拏而捕役又復縱容誠恐養癰遺患將來別滋事端至於捕務廢弛各州縣劫財害命懸案未結者不一而足臣得之風聞不敢冒昧而顯有確據者如嘉慶十二年棲霞縣民人柳開生之妹被賊匪三人強搶輪姦致柳氏羞忿自盡至今在逃之匪犯並未弋獲十九年秋間文登縣屬之台上村劉姓菜園有劫財害命一案至今歲春間賊匪卜六在兒馬村夜間偷竊被事主劉姓拏獲送縣始究出係其同夥三人所劫其一病故其一逃走至今亦未就獲此現在之實在情形所宜早爲查辦者也一賭棍引誘良民宜嚴行查拏也登州習俗每於農隙之時在山野廟宇賽神酬願首事之人先期稟報地方官臨期差衙役張挂告示禁止賭博酗酒俗名鎮山衙役而該役即藉此漁利託人向各賭棍斂錢俗名拉串其地方官之長隨等亦或藉查山爲名前往斂錢關說既定方許開賭賭棍因此毫無顧忌支搭帳房滿山遍野誘集鄉民晝夜聚賭此近來之惡習也臣又聞各集場每逢市期亦公然支搭帳房開局誘賭愚民挾升斗費赴市負販賭棍誘令人局罄其所有而後已甚至鄉村僻壤相習成風幾無處無窩賭之家愚民因此蕩產流而爲匪亦有畏其父兄賭債無償被賭棍再三逼迫逃避遠方終身不返者而地方官簿書期會而外於民間利弊漠不關心從未聞拏一賭棍嚴加懲創整飭風俗者所關誠非細也以上二條臣訪悉甚確其爲害甚鉅皆因地方官於民間公事付之胥吏而胥吏以地方之害爲利小民因距省城遠憚於上控大吏無從覺察地方官益得顛預了事現在清查保甲而匪徒敢如此橫行其爲陽奉陰違已可概見應請 旨敕下山東巡撫嚴飭地方官毋得縱役窩賊並準鄉保等協同緝拏送官審訊按新定白撞手條例懲治其

村市之窩賭者卽按保甲首告之例諭令出首又須不時稽察認真約束凡長隨衙役等人儻有斂錢縱賭者卽治以應得之罪如此則除莠安良商民均得樂業而山海錯處之區閭閻依然甯謐矣

文登縣志

卷一下

風俗

十五

